

摘藻堂四庫全書薈要

史部

欽定四庫全書薈要

史部

御批通鑑綱目前編卷九

詳校官編修臣汪鏞

欽定四庫全書薈要卷七千二百九十三

史部

御批資治通鑑綱目前編卷九

己丑周昭王元年

二年子滿生

周史

周史過曰昔昭王娶於房曰房后實有爽德協于丹

朱丹朱馮身以儀之生穆王焉

按此說左氏不載別見國語事頗誣怪以儀禮

黃氏傳取之今附其畧

十有四年魯侯弟濆弑其君幽公而自立

是為魏公

世家曰幽公十四年弟潰殺幽公而自立是為魏公

世本

作微公

履祥按弑君爭國之禍自是始而昭王不能討失政甚矣史稱昭王之時王道微缺朱子亦謂周綱陵夷自昭王始有以也夫

庚戌二十有二年釋氏生

周書記異曰周昭王二十二年釋氏生

甲子三十有六年

五十有一年王崩于漢子滿踐位

史記曰昭王之時王道微缺昭王南巡狩不返卒於江  
上其卒不赴告諱之也立昭王子滿是為穆王○外紀  
曰昭王南巡狩反濟漢漢濱之人以膠船進王至中流  
膠液船解王及祭公溺焉○大紀曰王在位久不能強  
於政治風化稍衰有光五色貫紫微井水溢是歲王征  
荆蠻軍旋涉漢梁敗王及祭公隕于漢王右辛餘靡振  
王北濟反振祭公王因是發疾崩○朱子曰涇舟膠楚  
澤周綱已陵夷

庚辰穆王元年

三年命君牙為大司徒伯冏為太僕正

大紀係三年

若史記則冏命是其初即位之年

書君牙篇曰王若曰嗚呼君牙惟乃祖乃父世篤忠貞

服勞王家厥有成績紀于太常

古文尚書作君雅周禮司勳曰凡有功者銘書

于王之太常司常云日月為常

惟予小子嗣守文武成康遺緒亦惟先

王之臣克左右亂四方心之憂危若蹈虎尾涉于春冰

蹈虎尾恐噬涉春冰恐陷穆王初即政憂危求助之切如此

今命爾子翼作股肱心

簪纓乃舊服無忝祖考

簪呂通脊也穆王資世職之臣處腹心之寄舊服即謂篤忠服

勞之事呂氏曰穆王方自憂危懼不克承故亦勉君牙無忝祖考各欲保其世業語益親切臣主蓋一體也

弘敷五典式和民則爾身克正罔敢弗正民心罔中惟

爾之中

蔡氏曰弘敷考大而布之也式和者敬而和之也則有物有則之則君臣之義父子之仁夫婦

之別長幼之序朋友之信是也典以設教言故曰弘敷則以民彛言故曰式和此司徒之教也然教之本則在君牙之身正也中也民則之體而人所同然也正以身言欲其所處無邪行也中以心言欲其所存無邪思也愚謂五典之教司徒之常職然上之人無躬行心得之實則民不從其令而從其意矣此所以貴於爾身之正爾心之中也  
夏暑雨小民惟曰怨咨冬祁寒小民亦惟曰怨

咨厥惟艱哉思其艱以圖其易民乃寧

祁大也夏而暑雨小民有暴身

沾體之勞冬而大寒小民有裂面龜手之勞故怨咨蓋自傷其衣食之艱難也厥惟艱哉嘆小民之誠為艱難也思小民之為艱難而為圖其易則小民乃安矣夫艱者饑寒之艱易者衣食之易古者司徒之職雖云掌教然土地人民之數制其田里教之樹畜辨其土宜以相民宅而知其利害以阜人民蕃鳥獸毓草木凡養民之利無一不掌蓋教養並行未嘗有無養而教者也故穆王念小民之艱而以圖易為君牙告皆其職也嗚

呼丕顯哉文王謨丕承哉武王烈啓佑我後人咸以正

罔缺爾惟敬明乃訓用奉若于先王對揚文武之光命

追配于前人

丕大也謨訓功烈文顯於前武承於後曰謨曰烈各指其盛言之文武以謨啓以烈



佑我後人者無一事不出於正文武之道可謂大備但人亡政息爾惟敬明乃訓奉若文武之道答揚其光命則足以追配爾祖父所以事先王者矣然則思王若曰艱圖易不必他圖有文武之道與前人之法在

君牙乃惟由先正舊典時式民之治亂在茲率乃祖考

之攸行昭乃辟之有父

先正即乃祖乃父也君牙由祖父舊典而法之民之治亂在此

而已法之則治否則亂惟循爾祖父之攸行則足以昭其君於有父謂法之即治也蔡氏曰按此篇專以君牙祖父為言然則君牙之祖父嘗任司徒之職而其賢可知矣惜載籍之無傳也陳氏曰成康之時芮伯為司徒君牙豈

○罔命篇曰

罔古文作

王若曰伯罔惟予弗克

其後耶

于德嗣先人宅丕后怵惕惟厲中夜以興思免厥愆

思免

厥愆此穆王知自克之難

欲寡其過篇中此意為多昔在文武聰明齊聖小大之

臣咸懷忠良其侍御僕從罔匪正人以旦夕承弼厥辟

出入起居罔有不欽發號施令罔有不臧下民祇若萬

邦咸休惟予一人無良實賴左右前後有位之士匡其

不及繩愆糾繆格其非心俾克紹先烈

承上文欲免厥愆因言文武之

聖猶有資於小大之臣故穆王自謂無良不可不賴前後左右有位之士以免已於愆而昭文武之烈

今

予命汝作大正正于羣僕侍御之臣懋乃后德交修不

逮慎簡乃僚無以巧言令色便辟側媚其惟吉士

此承上文

以文武之聖亦有賴於僕從之承弼此所以命伯冏為太僕之正以正羣僕侍御上修主德下簡近僚遠小人用君子以弼后德而遠於愆也僕臣正厥后克正僕臣諛厥后自聖后

德惟臣不德惟臣

此承上文以明得失之機穆王蓋深知僕御之邪正乃君德所係甚重非

輕僕臣諛則后自聖自聖則懷諫妄作而天下之亂自是生矣呂氏曰陪僕替御之臣後世視為賤品而不擇曾不知人主朝夕與居氣體移養常必由之潛消默奪於冥冥之中而明爭顯諫於昭昭之際抑末矣又曰僕臣諛厥后自聖自古小人之敗君德為昏為虐為侈為縱曷其有極至於自聖猶若淺之為害穆王獨以是蔽之者蓋小人之蠱其君必使之虛美熏心傲然自聖則謂人莫己若而欲予言莫之違然後法家拂士日遠而快意肆情之事亦莫或齟齬其間自聖之證既見而百疾從之昏虐縱侈皆其枝葉不足論也爾無昵

于儉人充耳目之官廸上以非先王之典非人其吉惟

貨其吉若時瘝厥官惟爾大弗克祗厥辟惟予汝辜

此皆

其導君於愆者或以淫巧進或以賄進此近習小人進身之徑伯同所當戒此二者呂氏曰自盤庚總于貨寶之戒至此篇乃復見之成湯文武之隆未聞數數以貨飭其臣也意其商周之衰乎王曰嗚呼欽哉永弼乃后于彛憲

此終篇首免愆之意而欲躋之於文武之道

○史記曰

穆王即位春秋已五十矣王道衰微穆王閔文武之道缺乃命伯冪申誡太僕國之政作冪命復寧○呂氏曰穆王之書存者三篇君牙同命初年之書也呂刑末年

之書也百年耄荒度作刑以詰四方固有明文君牙之篇曰惟予小子嗣守文武成康遺緒罔命之篇曰惟予弗克于德嗣先人宅丕后則皆初嗣歷服之言也與呂刑所謂仲叔季弟幼子童孫其辭氣新陳稚耄大有逕庭先後之次蓋無可疑者穆王中雖放逸不克保其始之祇畏然暮年哀敬初心復還謂之全德則駁猶不失為周之令王也○又曰穆王之命望於伯罔者深且長矣此心不繼造父為御周遊天下將必有車轍馬迹導

其侈者果出於僕御之間抑不知伯冏猶在職乎否也  
穆王豫知所戒憂思深長猶不免躬自蹈之人心操舍  
之無常可懼哉

履祥按君牙之書穆王初年方新之書也冏命之書  
穆王中年自克之書也穆王初年承昭王南征不復  
之後憂危恐陷故資世家喬木之臣處股肱心膂之  
寄以行文武之政自稱曰予小子曰嗣守遺緒皆初  
年語也至其中年境順心移雖其所為未必皆如列  
子及穆天子傳所載然楚右尹子革之言曰穆王欲  
肆其心周行天下將必有車轍馬迹焉祭公謀父作  
祈招之詩以止王心王是以獲没于祗宮則穆王亦  
不能無遊逸之過特能聞善言而自克耳冏命之篇  
曰思免厥愆曰予一人無良曰匡其不及曰繩愆糾

繆格其非心則皆欲寡其過之辭又周禮太僕之官  
下大夫耳或曰大正正于羣僕侍御之臣此太御也  
太御亦中大夫耳何至特作命書申戒明切若便辟  
若側媚若諛若廸上非典此蓋穆王深悔造父八駿  
之御知導君於侈者皆僕御之微故重其選而戒其  
弊哀痛真切然則罔命之書真中年自悔之書也其  
在祈招之後乎若如史記所言罔命作於初年如此  
諄切而中年周遊自放乃如此躬言之而躬自蹈之  
尚安取罔命之書乎然則是篇當受之祈招之後史  
失其年姑以類附於君牙而述其所見如此以待後  
之君子  
有考焉

### 十有三年王西征

紀年曰穆王十三年西征于青鳥之所憇

山海經曰三危之山青鳥

之居

十有七年王西征征徐戎

紀年曰穆王十七年西征見西王母賓于昭宮○列子  
曰周穆王時西極之國有化人來入水火貫金石反山  
川移城邑千變萬化不可窮極既已變物之形又且易  
人之慮非實能變物之形能使人目眩心忘耳  
浮屠善幻多技蓋西域人自有此術穆王敬  
之若神居亡幾何謁王同游化人之宮王以為清都紫  
微鈞天廣樂帝之所居自以居數十年不思其國也化



人復謁王同游所及之處仰不見日月俯不見河海光  
影所照王目眩不能得視音響所來王耳亂不能得聽  
百骸六藏悸而不凝意迷精喪請化人求還化人移之  
王若碩虛焉既寤所坐猶嚮者之處侍御猶嚮者之人  
視其前則酒未清肴未睇扶貴反王問所從來左右曰王  
默存耳由此穆王自失者三月而復更問化人化人曰  
吾與王神游也形奚動哉且曩之所居奚異王之宮曩  
之所游奚異王之圃王間惛疑慙亡變化之極徐疾之

間可盡模哉

化人之術能使人心迷貿耳觀穆王所感與化人所言固自可見但穆王欲心內昏

所主不存遂為所迷耳此肆心周游之病根也

王大悅不恤國事不樂臣妾肆

意遠遊命駕八駿之乘右服騊

古華字

騊而左綠耳右驂

赤驥而左白漈

古義字

主車則造父為御商

音泰兩字林商作西

為右次車之乘右服渠黃而左踰輪左驂盜驪而右山

子柏天主車參伯為御奔戎為右馳驅千里至于巨蒐

氏之國

巨蒐即禹貢渠搜

巨蒐氏乃獻白鵠之血以飲王具牛

馬之漣以洗王之足

漣竹用反

及二乘之人已飲而行遂宿

于崑崙之阿赤水之陽別日升崑崙之丘以觀黃帝之

宮而封之以詒後世遂賓于西王母觴于瑤池之上西

王母為王謠

曰白雲在天山陵自出道里悠遠山川間之將子無死尚能復來

王和之

曰予歸東土和合諸夏萬民均平吾顧見汝比及三年將復而野

其辭哀焉廼觀日之

所入行萬里王乃嘆曰於乎予一人不盈于德而諧於

樂後世其追數吾過乎乃還以歸

已上與穆天子傳畧同列子多寓言而穆

天子傳又多附會難信今以其末有自悔之辭姑存之以備考論

○史記曰蜚廉有子

曰季勝季勝生孟增幸於周成王是為宅皐狼皐狼生

衡父衡父生造父造父以善御幸於周繆王得驥溫驪  
驊騮耳之駒西巡狩樂而忘歸徐偃王作亂造父為  
御長驅歸周以救亂繆王以趙城封造父造父族由此  
為趙氏○昌黎韓氏曰周穆王無道意不在天下好方  
士說得八龍騎之西遊同王母宴于瑤池之上歌謳忘  
歸四方諸侯之爭辯者無所質正咸賓祭於徐贄王帛  
死生之物于徐之庭者三十六國得朱弓赤矢之瑞穆  
王聞之恐遂稱受命命造父御長驅而歸與楚連謀伐

徐徐不忍鬪其民走彭城武原山百姓隨而從之萬有

餘家

徐偃王事見史記後漢書博物志元和姓纂今止取昌黎所叙為稍詳密

○朱子曰不

有祈招詩徐方御宸極

履祥按穆王巡遊之事經史不載獨左氏有欲肆其  
心周行天下將皆必有車轍馬迹之說史記秦紀亦  
言其畧惟列子過有形容而雜書頗有附會若穆天  
子傳之類是也漢武帝巡狩神仙之事史遷所叙亦  
備矣後世猶有謗書之說謂或過其實也而漢武遺  
事所載又過之果有如遺事所載史記豈反隱而不  
書乎是知此書好事者文其誕無疑也然則穆天子  
傳亦此類耳周制死而謚而傳為穆王之名曰穆滿  
則其他謬附從可知矣今考左氏所載右尹所言曰  
欲肆其心曰將必有轍迹焉欲與將皆欲然之辭而

卒能聽祈招之詩以自克則穆王雖不無巡狩之過而未必皆如雜書所言也然則穆王雖不得為周之賢王亦不失為世之英主諸老謂論穆王者當以尚書為正此說得之

三十有五年征犬戎

大紀係此年

周語曰穆王將征犬戎

注曰犬戎西戎之別名在荒服

祭公謀父諫曰

不可

祭畿內之國周公之後為王卿士謀父字也

先王耀德不觀兵夫兵戢

而時動動則威觀則玩玩則無震是故周文公之頌曰載戢干戈載櫜弓矢我求懿德肆于時夏允王保之先王之於民也懋正其德而厚其性阜其財求而利其器

用明利害之鄉以文修之使務利而避害懷德而畏威  
故能保世以滋大昔我先世后稷以服事虞夏及夏之  
衰也棄稷弗務

謂太康廢稷之官不復務農

我先王不窋用失其官

而自竄于戎翟之間

堯封棄於郃至不窋失官去夏而遷於郃郃西接戎北近翟

不

敢怠業時序其德纂修其緒修其訓典朝夕恪勤守以  
敦篤奉以忠信奕世載德不忝前人至于武王昭前之

光明而加之以慈和事神保民莫不欣喜商王帝辛大

惡於民

辛紂名

庶民弗忍欣戴武王以致戎于商牧是先

王非務武也勤恤民隱而除其害也夫先王之制邦內

甸服

夏曰甸周曰畿此云甸服者古今通稱也故周襄王亦曰規方千里以為甸服

邦外侯服

侯衛賓服

自侯服至衛服皆賓服於王者

夷蠻要服戎翟荒服甸服者

祭侯服者祀賓服者享要服者貢荒服者王

祭祀享貢王皆朝貢

之名王則世一見者是所謂終王也

日祭

在甸服者供貢無時或時日貢之

月祀時享歲

貢終王先王之訓也有不祭則修意有不祀則修言有

不享則修文有不貢則修名有不王則修德序成而不

至則修刑於是乎有刑不祭伐不祀征不享讓不貢告



不王於是乎有刑罰之辟有攻伐之兵有征討之備有  
威讓之令有文告之辭布令陳辭而又不至則增修於  
德無勤民於遠是以近無不聽遠無不服今自大畢伯  
仕之終也

大畢伯仕犬戎之二君

犬戎氏以其職來王天子曰予

必以不享征之且觀之兵

犬戎於俗為荒服而於鎬京為近荒服者王今穆王以地

近責其享

其無乃廢先王之訓而王幾頓乎吾聞夫犬戎樹

惇能帥舊德而守終純固其有以禦我矣王不聽遂征  
之得四白狼四白鹿以歸自是荒服者不至

甲子四十有五年

五十年作呂刑以詰四方

呂刑篇曰惟呂命

呂國名書傳多作甫刑蓋呂國其後為甫猶邾之為鄒也惟呂命與惟說

命同文蓋穆王命呂侯為大司寇重修刑法更為五罰之制謂之呂刑至是頒之天下而申之詰命焉史記亦曰甫侯言於王作修刑辟蓋周制五刑凡二千五百未有五刑之贖而此增至三千又為五罰皆呂侯所參定也

王享國百年耄荒度作刑以詰四方

穆王年五十即位至是百歲八

十九十曰耄今百歲謂之耄荒蓋老而荒亂之謂穆王在位日久亦嘗肆遊觀之欲雖有善政而弛張不常晚年不無荒廢故審度作刑以詰四方之為姦慝暴亂者

王曰若古有訓蚩尤惟始

作亂延及于平民罔不寇賊鴟義姦宄奪攘矯虔

蚩尤炎帝

之末榆罔之世霸諸侯者自洪荒以來風俗渾朴而蚩尤始為暴亂之事民俗因以敗壞奪人之寇殺人之賊鴟張為義亂外之姦亂內之宄奪攘之風於是皆有之矯者正也虔者劉也此上下或有缺文謂聖人始制為刑以矯正虔劉之益黃帝既制兵以殺蚩尤又制刑以矯正虔劉其遺類也漢書武帝紀矯虔吏因執以侵暴

矯音矯文意與下文同

苗民弗用靈制以刑惟作五虐之刑曰法

殺戮無辜爰始淫為劓刵桼黥越茲麗刑并制罔差有辭民興胥漸泯泯焚焚罔中于信以覆詛盟虐威庶戮方告無辜于上帝監民罔有馨香德刑發聞惟腥皇

帝哀矜庶戮之不辜報虐以威遏絕苗民無世在下

苗民

堯時諸侯因上古聖人有矯虐之刑於是作五虐之刑以殺戮無辜又淫為劓剕劓剕黥凡麗于刑制者更不差等其獄辭之曲直而例加之於是民更相漸于昏亂之習無復忠信互相詛盟矣詛者背相祝盟者面質神此皆刑政不平曲直不明之故也凡苗民虐威所加衆庶被戮之人所在告無辜于上帝降監下民罔有馨香之德但有淫虐發聞之腥穢堯舜於是哀矜衆庶被戮之非辜既立五刑報苗民君臣之虐以示其威用遏絕苗民使之不得繼世於下國言竄于三危也皇帝謂堯竄苗之事蓋堯老舜攝之時○墨子曰昔者聖王制為五刑以治天下逮至有苗之制五刑以亂天下則此豈刑不善哉用刑之不善也是以先王之書以刑之道曰苗民否用諫折則刑唯作五殺之刑曰法此乃命重黎言善用刑者以治民不善用刑者以為五殺

絕地天通罔有降格

重黎即羲和也呂氏曰治世公道昭明為善得福為惡得禍民曉然

知其所由不求之茫昧之間三苗昏虐民之得罪者莫知其端無所控訴相與聽於神祭非其鬼天地神人之典雜揉瀆亂此妖誕之所以興人心之所以不正也聖人當務之急莫先於正人心首命重黎修明祀典高卑上下各有分限絕地天之通嚴幽明之分妖誕之說悉皆屏息○楚語曰少皞氏之衰也九黎亂德民神雜揉夫人作享家為巫史無有要質烝享無度民神同位民瀆齊盟無有嚴威顓頊受之乃命南正重司天以屬神命北正黎司地以屬民使復舊常無相侵瀆是謂絕地天通其後三苗復九黎之德堯復育重黎之後不忘舊者使復典之○愚謂自蚩尤為亂而民有寇攘姦宄之習聖人是有矯虔之刑自三苗以刑為虐而民有巫祝詛盟之習聖人是有重黎之命前後聖人其為民心計可謂至矣大指已見虞書之紀

羣后之

逮在下明明棐常鰥寡無蓋

正人心固重黎之職然非二臣所能獨為亦惟羣后

及在下有司各昭明政化有此非常之明雖鰥寡之情無不上達蓋巫祝之興始於政化不明下情不得以上

達故爾

皇帝清問下民鰥寡有辭于苗德威惟畏德明惟

明乃命三后恤功于民伯夷降典折民惟刑禹平水土

主名山川稷降播種農殖嘉穀三后成功惟殷于民士

制百姓于刑之中以教祇德穆穆在上明明在下灼于

四方罔不惟德之勤故乃明于刑之中率乂于民棐彛

承上文而言清問下民而民皆言有苗之暴虐與其風聲氣習之為害於是以德為威而人心知所畏以德明

民而人心知所向先命三后以為教養之具此德明惟明之事也而復命士師以刑法之防此德威惟畏之事也聖人制刑之本如此伯夷降下典禮以示天下天神地祇人鬼既各有正禮然出禮則入刑降典所以折其民之入刑者而回入於禮也禹平水土以安民生為山川立主祭之典以正民心蓋既絕地天通於是修山川之正祀又各使有土之君主之不至於瀆稷降播種之法使農殖嘉穀蓋前此民猶雜食草木之實自稷教民稼穡而民始皆殖嘉穀矣三后成功民俗殷盛而後命皋陶為士師制百姓以刑法之中不偏於輕以惠姦不過於重以虐民立為中典亦所以使民祇敬為德而已蓋其君臣之間和敬示德於上而精明承德於下躬行心得其表裏政令皆可為民之法灼于四方人心觀感固不惟德之勉而後明刑法之中治其民之非彛者而已蓋教養如此而猶或有非彛者然後刑之也又按虞書命皋陶之辭曰蠻夷猾夏而禹亦曰何遷乎有苗觀

此篇所述則三苗之威馘氣習其始為天下之害可知蓋自上古之世風氣醇朴蚩尤始為亂而民始有為惡之習聖人始制刑以矯之其後有苗既為五虐之刑以殘其民其民又為詛盟之習以瀆其神於是暴虐妖誕二者威馘氣習得入中夏聖人始命重黎以止妖誕繼命羣后以通下情又命伯夷以降典禮命伯禹以安民生正祀典命后稷以豐民財而復命皋陶定為至中不偏之刑自是後世之言刑者自皋陶始傳所謂皋陶之刑也蓋以其為不偏不易之法也又按此篇始述有苗之刑以為暴虐之戒繼述聖人之刑以為後世之準蓋聖人所以制刑者教養之具無一不至然後立刑以制之而刑法之中亦無非教此蓋發明聖人立刑之本末而後世遂謂皋陶不與三后之典獄非訖于威惟訖于列為聖人各於刑官失其指矣

富敬忌罔有擇言在身惟克天德自作元命配享在下



訖絕惟與忌畏也謂當時為典獄之官者非但絕于威勢之請託與絕于貨賄之賂遺而已且能以敬自將以理自畏其身無可擇之言上體天德所以能自作元命而上對于天享祀無窮于下蓋獄者民之司命天之所託生殺予奪上與天對又臯陶明刑之功享有國土宗祀不絕而當時為典獄者亦必祀于理官蓋古者有道德者死則以為樂祖祭于瞽宗法家亦然至後漢時繫獄者猶祭臯陶此其證也或曰此章穆王蓋以勉其典獄之臣絕私憾德王曰嗟四方司政典獄非爾惟作天上配臯陶耳亦通

牧今爾何監非時伯夷播刑之迪其今爾何懲惟時苗民匪察于獄之麗罔擇吉人觀于五刑之中惟時庶威奪貨斷制五刑以亂無辜上帝不蠲降咎于苗苗民無

辭于罰乃絕厥世

此章總上章以唐虞之典刑為監以苗民之用刑為懲四方司政典獄孔

氏謂即諸侯也此章詞語自相問答以發其意謂為司政典獄者豈非爾諸侯為天牧民者乎此欲諸侯以刑獄為重責也今爾何所觀法豈非伯夷所布典刑之道乎此謂典禮為刑之道蓋憲章無二出禮則入刑也其今爾何所懲戒豈非苗民所受妄刑之罰乎蓋苗民不察獄辭之所麗何刑又不擇吉人以審刑法之中正一為威勢之徇奪於貨賄之貪又以私意斷制五刑亂及無辜之人故上帝不蠲貸其罪苗民亦不得以自逭其罰遂至於絕世此用刑不當之禍所當懲也

王曰嗚呼念之哉伯父伯兄仲

叔季弟幼子童孫皆聽朕言庶有格命今爾罔不由慰

日勤爾罔或戒不勤天齊于民俾我一日非終惟終在

人爾尚敬逆天命以奉我一人雖畏勿畏雖休勿休惟

敬五刑以成三德一人有慶兆民賴之其寧惟永

此下告諸

侯也格如來格之格庶幾其能入吾教命之內也日勤  
孔氏作曰後儒見下文一日非終之說又讀為日蓋言  
日則勤在其中矣言勤不必言日也聽察審訊以求其  
情莫煩於獄一或不勤則職有不盡而民有不得其死  
者矣此章專告貴戚之臣憂其或怠故專以勤為主爾  
所以無不自慰者曰勤而已蓋其情得其事集而其職  
盡也爾罔或徒知戒而不勤蓋既任其職孰不知重其  
事然憚於勞而不勤則刑罰不中雖戒之或無及也蔡  
氏謂戒亦善心也而用刑豈可以或戒也哉此謂刑罰  
已施雖悔無及也蓋天以刑整齊其民既俾我君臣為  
之一日之間不能終其事與能終其事此其責在人矣  
爾尚敬謹以上順天命承我一人雖獄事情辭之煩可

畏也勿以為畏惟勤而已雖得情聽斷之餘可休也勿以為休亦惟勤而已能謹審五刑之用則刑故無小所以成其剛德罪疑惟輕所以成其柔德刑罰得中所以成其正直之德則君慶於上民賴於下家國安寧之福久而不替矣此王曰吁來有邦有土告爾祥刑在今爾皆勤恤之效也

安百姓何擇非人何敬非刑何度非及

刑者不祥之器謂之祥刑者則

以其為弼教之良法而用刑者又以慈祥之心行之也及者連及也何所當擇豈非司獄之人乎何所當謹豈非用刑之際乎何所當審豈非連及之人乎當及而及所以證獄不當及而及則連逮無辜矣兩造具

備師聽五辭五辭簡孚正于五刑五刑不簡正于五罰

五罰不服正于五過五過之疵惟官惟反惟內惟貨惟

來其罪惟均其審克之

周禮以兩造聽民訟兩造謂兩爭者皆至也具備者詞證皆在

也師衆也謂羣有司也五辭麗于五刑之獄辭也簡者核其實孚者無所疑也正猶漢書所謂當也五罰即五贖也獄辭核實無疑者則當於五刑於五刑而不應其實者五刑之疑者也則當於五罰以贖之當于五罰而不服者則五罰之疑者也故又當于五過以宥之然五過之法公也其為之病者則私也私者或以權勢或以報私或以婚姻女謁或以貨賄交通或以求干請託為是五者而廢法以出人之罪則治獄者與之同罪矣其審克之總結上文審者盡其心克者盡其力也五刑之疑有赦五罰之疑有赦

其審克之簡孚有衆惟貌有稽無簡不聽具嚴天威

此承

上文五刑不簡正于五罰此五刑之疑有赦也五罰不服正于五過此五罰之疑有赦也其審克之重言以丁

寧之也簡孚有衆即師聽五辭之謂也惟貌有稽此簡孚之術也小司寇所謂色聽氣聽耳聽目聽者也至於不經衆人之簡核則上之人不可以聽斷所以求詳致嚴如此者蓋獄乃天討所係天威甚近而可畏其可有一毫不盡其心乎

墨辟疑赦其罰百鍰閱實其罪劓辟疑赦其

罰惟倍閱實其罪剕辟疑赦其罰倍差閱實其罪宮辟

疑赦其罰六百鍰閱實其罪大辟疑赦其罰千鍰閱實

其罪墨罰之屬千劓罰之屬千剕罰之屬五百宮罰之

屬三百大辟之罰其屬二百

此五罰之數也罰以黃鐵即今銅也六兩曰鍰一說

每鍰六兩三分兩之二則一鍰半斤也倍一百曰二百倍二百而又差為五百辟疑赦之則從罰罰亦閱實其

罪當於罰則罰之下文罰懲非死人極于病即此意也  
按舜典五刑有流而無贖正義謂古者五刑有降而無  
贖鞭作官刑扑作教刑又小於此則金作贖刑若今罰  
直耳穆王始制為五刑之贖蓋以贖代流也其弊便富  
而虐貧富者可贖貧者難免雖穆王申有司獄貨之戒  
其實開國家貨獄之塗蓋其弊必至于此然贖因於疑  
而穆王於贖之中又閱實其罪猶恐誤罰罰或不實其  
罪則正於五過矣其慈祥之意可見且罰猶不苟則刑  
必不苟矣又按周禮五辟之屬皆五百而此墨劓之屬  
各千宮減於舊二百大辟減於舊二百輕刑雖增而重  
刑則減矣然則穆王非獨制為五刑之屬三千上下比  
贖刑之法又制為輕刑之法矣

罪無僭亂辭勿用不行惟察惟法其審克之上刑適輕

下服下刑適重上服

此言用五刑之宜也以情辭之上  
下比附其罪不可差亂其獄辭而

妄為升降又不可引用久不行之法蓋古今更定不同  
舊有是條久已不用民不知而犯之既犯而復引用焉  
是陷民也察者審於心法者當其刑又云其審克之以  
致丁寧之意罪在上刑而情適輕則服下刑此減等也  
罪在下刑而情適重則服上刑  
輕重諸罰有權刑罰世  
此加罪也此又用刑之權宜也

輕世重惟齊非齊有倫有要

此又論五罰之權而總言  
刑罰謂非獨五刑有上服

下服至於輕重其五罰之用則亦有權焉蓋亦權其情  
而為之輕重也然刑與罰又有視世變而為輕重者如  
周禮刑新國用輕典刑平國用中典刑亂國用重典是  
也大抵情法時世參差不齊權所以齊之則各有條理  
各有典要焉此用  
罰懲非死人極于病  
此承上文論罰  
而言也穆王恐

有司以論贖為輕而不加審故又云五罰所贖其懲  
人者雖非五刑軀命所闕然民重出贖亦甚病矣  
非



佞折獄惟良折獄罔非在中察辭于差非從惟從哀敬折獄明啓刑書胥占咸庶中正其刑其罰其審克之獄

成而孚輸而孚其刑上備有并兩刑

此申明折獄之方所以審刑罰之宜

者佞辭給也不可以辯給之辭折獄惟當以慈良之心折獄從猶今律言承也察辭于差此古今聽獄之要訣也凡辭之非實者終必有差故察獄辭者必於其差而察之則囚之不承者承矣然既得其情則當以哀矜之心敬謹之意折之明啓刑書與羣有司共占視之則庶幾得其中正矣其當入于刑者其當降而罰者其詳審而盡心力焉獄之成既得其實然後可輸其實於上而上其斷獄之書者又當備述其情辭有兩述之人各有所犯則并兩刑而上之不可  
王曰嗚呼敬之哉官伯族以輕重勝負而有所偏也

姓朕言多懼朕敬于刑有德惟刑今天相民作配在下  
明清于單辭民之亂罔不中聽獄之兩辭無或私家于  
獄之兩辭獄貨非寶惟府辜功報以庶尤永畏惟罰非  
天不中惟人在命天罰不極庶民罔有令政在于天下

承上文折獄之說又總告之也官獄官伯諸侯族同姓  
姓異姓也單辭無證之偏辭也兩辭兩造之辭也家如  
不家於喪之家謂私財也府藏也辜功罪狀也猶釋氏  
云罪業也穆王享國之久老於世故晚復哀矜故其言  
多懼欲人知所重而聽之也朕敬于刑謹之至也惟有  
德者則可以用刑蓋天相佑下民立典獄之官以治之  
為民司命上與天配單辭者無證之辭人所難決者也  
惟有德者其心明且清則能得單辭之實兩辭者兩證

之辭雖人所易決而一有偏徇之心則偏矣惟有德者其心中而不偏則能聽兩辭之獄然兩辭之易偏者亦或賄賂蔽之故戒之無或私取貨于獄之兩辭因獄取貨此貨非寶適以藏諸罪狀耳報應之理衆罪悉至則一時之得有永久可畏之罰是非天偏治鬻獄之人亦惟人自致其禍罰之命使天罰不至則獄吏皆得以行其私庶民無復被令政之澤

王曰嗚呼嗣孫今往何監

于天下矣此申戒以警之也

非德于民之中尚明聽之哉哲人惟刑無疆之辭屬于五極咸中有慶受王嘉師監于茲祥刑

此總上文詔後世也嗣孫凡官

伯族姓嗣世子孫也屬如屬有疆場之事之屬適也謂適或有時而用之也五極五刑也五刑者刑之極者也嘉師良民之衆也言繼世子孫自今以往何所監視豈非以德爲民所取中乎此爲要語不可不明聽之大抵

賢哲用刑自有無窮之譽雖適有時而用極法然旣合中正之理則亦有餘慶矣蓋世人每言寬刑有陰德之報而不知雖用大刑而合於中正亦有餘慶之報也故穆王明此以勉之受王良民之衆其監此慈祥之刑夫民本皆良民或因物有遷雖不免設刑以防之然無非慈祥之意則亦無非良善之法不可以忿疾之心行之也○呂氏曰世衰則情偽繁人老則經歷熟穆王之時文武成康之澤浸微姦宄日勝其作書於既耄閱世故而察物情者亦熟矣故古今犴獄言之畧盡用刑者所宜盡心焉又曰是書哀矜明練固夫子存以示後世而微見其意者亦不可不察也

履祥按呂刑之書穆王晚年之書也自昭王南征不復周綱陵夷穆王在位日久中更荒廢雖能自克然風俗日陵情偽日繁迨至晚年命呂侯為大司寇重修刑法史謂甫侯言於王而修之也故曰呂刑至是

作為誥命頒之天下大抵增墨劓之條以盡天下之惡而減宮刑大辟之條以逭犯死之衆既制五罰以贖五刑之疑又制五過以寬五罰之疑刑繁而輕此皆衰世之意也傳曰夏之衰也作禹刑商之衰也作湯刑今呂刑之作可以知世變矣然穆王老於世故備知獄事曲折之詳其哀矜惻怛之意敬審忠厚之風尚可法也

子王子曰呂刑之書律書也法吏之辭也徒能精察乎典獄之姦而不識聖人制刑之本意首以五刑創于有苗而聖人用是報之遂為常法則是聖人之制刑反師有苗之為虐也斯言也豈不大害於義哉予固知其為

法吏之辭也舜之刑未嘗不輕而輕者本於罪之可疑  
穆王之刑亦未嘗不輕而輕者本於罪之不可宥舜之  
所以必刑者期於無刑穆王之所以必贖者導其起辟  
且大辟之刑而可贖則凡有千鍰之貲者無所往而不  
可殺人矣烏得而不啓後世之亂哉但其盡折獄之情  
偽曲折而哀矜惻怛之意猶有三代之遺風焉聖人以  
其世之變法之變存之於書亦以其能精察乎典獄之  
姦尚可以為後世聽訟用刑之戒非以其贖刑之可取

也

五十有五年王崩于祗宮子繁扈踐位

楚右尹子革曰昔穆王欲肆其心周行天下將皆必有

車轍馬跡焉祭公謀父作祈招之詩以止王心王以是

獲沒於祗宮其詩曰祈招之愔愔式昭德音思我王度

式如玉式如金刑民之力而無醉飽之心

杜氏曰祈父周司馬招其

名蓋指司馬以諷王也陸氏曰招常違反刑左氏作形家語作刑朱子謂當作刑招當如徵招角招之招詩歌之名  
○逸周書曰穆王思保位為難恐貽世羞欲自警言也

寤作史記史記維正月王在成周昧爽召三公左史戎

夫曰今朕寤遂事驚予乃取遂事之要戒俾戎夫言之

朔望以聞信不行義不立則哲士陵君政禁而生亂皮

氏以亡

古諸侯也愚謂後漢之亡其證亦然

諂諛日近方正日遠則邪人

專國政禁而生亂華氏以亡好貨財珍怪則邪人因財

而進邪人因財而進則賢良日蔽而遠賞罰無位隨財

而行夏后以亡嚴兵而不仁者其臣懾其臣懾而不敢

忠不敢忠則民不親其吏刑始於親遠者寒心殷商以



亡樂專於君者權專於臣權專於臣則刑專於民君娛

於樂臣爭於權民盡於刑有虞氏以亡

商均之後也

奉孤以

專命者謀主必畏其威而疑其前事

謀主謂孤長大也前事謂專命者

挾德而責數日䟽位均而爭平林以亡

挾其見奉之德而責其前專命

之事此與成王周公反矣位均勢敵也

大臣有錮職誅者危昔者質沙

三卿朝而無禮君怒而久拘之譁而弗加諸卿謀變質

沙以亡

錮職專權也

外內相間下撓其民民無所附三苗以

亡弱小在強大之間存亡将由之則無天命矣不知命

者死

無天命命在強壯者也  
不知命則足以亡也

有夏之方興也扈氏弱而

不恭身死國亡嬖子兩重者亾昔義渠氏有兩子異母  
皆重君病大臣分黨而爭義渠以亡功大不賞者危昔  
平州之功大而不賞謫臣日賞貴功日怒而生變平州  
之君以走出召遠不親者危昔有林氏召離戎之君而  
朝之至而不禮留而弗親離戎逃而去之林氏誅之天  
下叛林氏昔者曲集之君伐智而專事強力而下賤其  
臣賢良皆伏愉州氏伐之君孤而無使曲集以亡昔者

有巢氏有亂臣而貴任之以國假之以權擅國而主斷

君已而奪之臣怒而生變有巢以亡斧小不勝柯者亡

昔有鄆之君嗇儉減爵損祿羣臣卑讓上下不臨後君

少弱禁罰不行重氏伐之鄆君以亡久空重位者危昔

有共工自賢自以無臣久空大官下官交亂民無所附

唐氏伐之共工以亡犯難爭攘疑者死昔有林氏上衡

氏爭權

爭為犯難  
不果為疑

林氏再戰弗勝上衡氏偽義弗剋俱

身死國亡知能均而不親並重事君者危昔有南氏有

二臣貴寵力鈞勢敵競進爭權下爭朋黨君弗禁南氏

以分昔有果氏好以新易故故者疾怨新故不和內爭

朋黨陰事外權有果氏以亡爵重祿輕比已不成

據注疑作

取民自成

者亡昔有畢程氏損祿增爵羣臣貌匱比而戾民

畢程氏以亡

有位無祿取民自成民不堪予求尤而罪之

好變故易常者亡

昔陽氏之君自伐而好變事無故業官無定位民運於

下

運亂移也

陽氏以亡業刑而愎者危昔穀平之君愎類無

親破國弗剋業刑用國

愎狠也類戾也國勝破以刑為業也

外國相援穀

平以亡武不止者亡昔阪泉氏用兵無已誅戰不休并  
兼無親文無所立智士寒心徙居至于獨鹿諸侯叛之  
阪泉以亡恨而無親者亡昔者縣宗之君恨而無聽

納不

忠言執事不從宗職者疑發大事羣臣解體國無立功縣

宗以亡昔者玄都賢鬼道廢人事天謀臣不用龜策是  
從神巫用國哲士在外玄都以亡文武不行者亡昔西  
夏性仁非兵城郭不修武士無位惠而好賞屈而無以  
賞唐氏伐之城郭不守武士不用西夏以亡美女破國

昔者續陽強力四征重丘遺之美女續陽之君悅之熒惑不治大臣爭權遠近不相聽國分為二宮室破國昔者有洛氏宮室無常池囿廣大工巧日進以後更前民不得休農失其時飢饉無食成湯伐之有洛以亡

此篇諸本

不一今以蜀本刊定以存遺事附本紀之後

乙亥共王元年

三年

國語曰共王遊於涇上密康公從有三女奔之其母曰

必致之於王夫獸三為羣人三為衆女三為粲王田不  
取羣公行不下衆王御不參一族夫粲美之物也衆以  
美物歸女而何德以堪之王猶不堪况爾小醜乎小醜  
備物終必亡康公不獻一年王滅密

十有二年王崩子囂踐位

丁亥懿王元年徙都槐里

大紀曰自王為政王室始衰徙都槐里

二十有五年王崩共王之弟辟方立

史記曰懿王之時王室遂衰詩人作刺

按詩之時世多不可考其時王

風未作變小雅多有刺詩而莫知其時世衛氏詩序皆以為刺幽王太史公多見古書殆必有考胡氏大紀以齊哀公之立當在懿王之世而以詩序刺哀公之詩隸之然不可考矣

### 壬子孝王元年

甲子十有三年封非子為附庸邑之秦

用大紀例以甲

子為紀今附此年此周太史儋所謂始周與秦合者也史儋又曰合而別後五百歲復合按別者謂周東遷復合者謂秦併周也

史記曰惡來革者蜚廉子也有子曰女防女防生旁舉



旁舉生太凡太凡生大駱大駱生非子以造父之寵皆

蒙趙城姓趙氏非子居犬丘好馬善養息之犬丘人言之

周孝王孝王召使主馬于汧渭之間馬大蕃息孝王欲

以為大駱適嗣申侯之女為大駱妻生子成為適申侯

乃言孝王曰昔我先驪山之女為戎胥軒妻生中湣

中衍

玄孫也在西戎保西垂生蜚廉蜚廉生惡來以親故歸周保西垂西垂以其

故和睦今我復與大駱妻生適子成申駱重昏西戎皆

服所以為王王其圖之於是孝王曰昔柏翳為舜主畜

畜多息故有土賜姓嬴今其後世亦為朕息馬朕其分土為附庸邑之秦使復續嬴氏祀號曰秦嬴亦不廢申侯之女子為駱適者以和西戎

十有五年王崩諸侯復立懿王太子燹

大紀曰孝王之世大電江漢水牛馬死

丁卯夷王元年始下堂而見諸侯

大紀附  
元年

禮記曰覲禮天子不下堂而見諸侯下堂而見諸侯天子之失禮也自夷王以下○經世曰國自此衰

按史記  
懿王崩

共王弟辟方立是為孝王孝王崩諸侯復立懿王太子變是為夷王然則夷王本未必立而立於諸侯之手故為是加禮於諸侯下堂而見之又其時王室浸衰自是永為例矣

### 八年楚子熊渠伐庸揚粵至于鄂

大紀係此年

楚世家曰周文王之時祝融之孫季連苗裔曰鬻熊事

文王

今書有鬻熊子載其事疑偽書

其子熊麗生熊狂狂生熊繹熊繹

當周成王時舉文武勤勞之後嗣而封熊繹於楚蠻封

以子男之田姓芊氏居丹陽

徐廣曰在南郡枝江

楚子熊繹與魯

公伯禽衛康叔子牟晉侯燮齊太公子呂伋俱事成王

左傳俱服

熊繹生熊艾艾生熊黜黜生熊勝勝以弟揚

事康王

為後熊揚生熊渠渠生子三人當周夷王之時王室微諸侯或不朝相伐熊渠甚得江漢間民和乃興兵伐庸揚粵至于鄂熊渠曰我蠻夷也不與中國之號諡乃立其長子康為句亶王

張晏曰今江陵

中子紅為鄂王

九州記曰今武昌

少子執疵為越章王皆在江上楚蠻之地

十有六年王崩子胡踐位

左氏曰至于夷王王愆于厥躬諸侯莫不並走其望以

祈王身○史記齊世家曰太公卒子丁公伋立丁公卒  
子乙公得立乙公卒子癸公慈母立癸公卒子哀公不  
辰立哀公時紀侯譖之周周烹哀公而立其弟靜是為  
胡公胡公徙都薄姑

癸未厲王元年

楚世家曰周厲王暴虐熊渠畏其伐楚亦去其王  
終前夷王  
八年  
楚事

十有二年衛貞伯薨子嗣

是為頃侯

世家曰衛康叔卒子康伯立

即左傳所稱王孫牟父是也

康伯卒子

考伯立考伯卒子嗣伯立嗣伯卒子康伯立康伯卒子

靖伯立靖伯卒子貞伯立貞伯卒子頃侯立頃侯厚賂

周夷王夷王命衛為侯

按史記自頃侯始有年以年表考之當係此年非夷王之世

古史曰按書康叔稱衛侯又曰孟侯蓋以侯為方伯故其子孫六世稱伯猶詩以召公為召伯而非伯爵也至頃侯蓋不復為方伯故但以爵稱非以賂故得侯也

十有四年曹孝伯薨子喜嗣

是為夷伯

世家曰曹叔振鐸卒子太伯脾立太伯卒子仲君平立

仲君平卒子宮伯侯立宮伯侯卒子孝伯雲立孝伯卒  
子夷伯喜立

十有五年燕惠侯立

世家曰燕自召公已下九世至惠侯

蔡厲侯薨子嗣

是為武侯

世家曰蔡仲卒子蔡伯荒立蔡伯卒子宮侯立宮侯卒  
子厲侯立厲侯卒子武侯立

十有九年齊公子山弑其君胡公而自立

是為獻公

世家曰哀公之同母少弟山怨胡公乃與其黨率營丘人襲攻殺胡公而自立是為獻公

按史記獻公立在夷王之時以年表考之

當係

此年

二十年齊侯徙治臨菑

世家曰獻公元年盡逐胡公子因徙治臨菑

宋厲公薨子舉嗣

是為僖公。史記凡僖字皆作釐

世家曰微子卒立其弟衍是為微仲

禮記曰微子舍微其孫肅而立衍

仲卒子宋公稽立宋公卒子丁公申立丁公卒子湣公



共立湣公卒弟煬公熙立湣公子鮒祀弑煬公而自立  
是為厲公厲公卒子釐公舉立

晉厲侯薨子宜臼嗣

是為靖侯

世家曰唐叔子燮是為晉侯

正義曰唐叔之子燮父徙居晉水傍改曰晉侯晉

侯子寧族是為武侯武侯之子服人是為成侯成侯子  
福是為厲侯厲侯之子宜臼是為靖侯

二十有一年秦嬴卒子秦侯嗣

二十有四年陳慎公薨子寧嗣

是為幽公

世家曰胡公卒子申公犀侯立申公卒弟相公皋羊立  
相公卒立申公子突是為孝公孝公卒子慎公圉戎立  
慎公卒子幽公寧立

衛頃侯薨子嗣

是為  
僖侯

二十有八年齊獻公薨子壽嗣

是為  
武公

三十年以榮公為卿用事

國語曰厲王說榮夷公為良夫曰王室其將卑乎夫榮  
公好專利而不知大難夫利百物之所生也天地之所

載也而或專之其害多矣天地百物皆將取焉胡可專也所怨甚多而不避大難以是教王王能久乎夫王人者將導利而布之上下者也使神人百物無不得其極猶日怵惕懼怨之來也故頌曰思文后稷克配彼天立我烝民莫匪爾極大雅曰陳錫載周是不布利而懼難乎故能載周以至于今今王學專利其可乎匹夫專利猶謂之盜王而行之其歸鮮矣榮公若用周必敗既而榮公為卿士諸侯不享

史記曰厲王即位三十年好利近榮夷公芮良夫諫不聽卒以

榮公為卿士用事

墨子曰厲王染於纆公長父榮夷終

三十有一年秦侯卒子公伯嗣

楚熊延卒子熊勇嗣

世家曰熊渠長子毋康早死熊渠卒中子熊摯紅立其弟熊延弑而代立

三十有三年殺言者

國語曰厲王虐

大紀有曰時荆楚寇於南獫狁寇於北淮夷寇於東命虢公征之不克徵歛數

起虐用其民民不堪命聚議而興謗

召公告曰民不堪命矣王怒得衛巫

使監謗者以告則殺之

史記又曰其謗鮮矣諸侯不朝三十四年王益嚴

國人

莫敢言道路以目王喜告召公曰吾能弭謗矣乃不敢言召公曰是鄣之也防民之口甚於防川川壅而潰傷人必多民亦如是是故為川決之使導為民者宣之使言故天子聽政使公卿至于列士獻詩瞽獻典史獻書師箴賁賦矇誦百工諫庶人傳語近臣盡規親戚補察瞽史教誨耆艾修之而後王斟酌焉是以事行而不悖民之有口也猶土之有山川也財用於是乎出猶其有

原隰衍沃也衣食於是乎生口之宣言也善敗於是乎  
興行善而備敗所以阜財用衣食者也夫民慮之於心  
而宣之於口成而行之胡可壅也若壅其口其與能幾  
何王弗聽於是國人莫敢出言三年乃流王子于澠

三十有四年秦公伯卒子仲嗣

三十有六年西戎反滅犬丘大駱之族

史記曰秦仲立三年周厲王無道諸侯或叛之西戎反  
王室滅犬丘大駱之族

三十有七年國人叛襲王王出居于彘召公周  
公行政是為共和太子靖匿于召公之家

本紀曰國莫敢出言三年乃相與畔襲厲王王出奔於  
彘厲王太子靖匿召公之家國人聞之乃圍之召公曰  
昔吾驟諫王王不從以及此難也今殺王太子王其以  
我為讎而懟怒乎夫事君者險而不懟怒而不怨況事  
王乎乃以其子代王太子

國語大  
同小異

太子竟得脫召公周

公二相行政號曰共和

按莊子竹書紀年及稽古錄皆  
作共伯和莊子司馬注其事尤

詳云共伯名和修其行好賢人諸侯皆以為賢周厲王之難天子曠絕諸侯皆請以為天子共伯不聽即于王位十四年大旱屋焚卜于太陽兆曰厲王為崇召公乃立宣王共伯復歸于宗道遙得意共山之首共丘山今在河內共縣西魯連子云共伯後歸于國得意共山之首紀年云共伯和即于王位孟康注古今人表謂入為三公○按此事經傳皆不言及今從史記

庚申三十有八年共和行政

史記自是事始有年稽古錄稱共和

九年

晉靖侯薨子司徒嗣

是為僖侯

四十有一年蔡武侯薨子嗣

是為夷侯



楚熊勇卒弟熊嚴立

甲子四十有二年王在羣

四十有四年曹夷伯薨弟彊立

是為幽伯

四十有七年陳幽公薨子孝嗣

是為僖公

四十有八年宋僖公薨子覬嗣

是為惠公

五十有一年王死于羣周召二伯立太子靖

左氏曰至于厲王王心厲虐萬民弗忍居王于羣諸侯  
釋位以間王政宣王有志而後效官○本紀曰宣王即

位二相輔之修政法文武成康之遺風諸侯復宗周

履祥按周自夷王王政不綱厲王初立諸侯畏之荆楚自去王號三十年間天下無他故其後好利用榮夷公又以監謗而殺言者雖芮良夫召穆公交有陳諫又皆有大雅之刺以感王心而皆不聽卒以流亡身死於彘彘在河汾之間詩所謂汾王是也嗜好用舍之間可不謹諸賴諸大臣彌縫其間王室不墜卒立宣王相之繫然復興蓋其時周室尚可振也至幽王再禍而宗周為墟訖不復振悲夫

楚熊嚴卒子熊霜嗣

甲戌宣王元年以秦仲為大夫誅西戎以尹吉甫為將北伐獫狁至于太原

秦紀曰周宣王即位

徐廣曰秦仲之十八年

乃以秦仲為大夫誅

西戎○小雅六月之詩曰六月棲棲戎車既飭四牡騤

騤載是常服玃狁孔熾我是用急王于出征以匡王國

集傳曰六月癸未之月也棲棲猶皇皇不安之貌騤騤強貌常服戎事之常服以韎韁為弁又以為衣而素裳白舄也玃狁即北狄也司馬法冬夏不興師今六月出師者以玃狁甚熾其事危急不得已而王命於是出征以正王國也比物四驪閑之維則維此六月既成我服我服

既成于三十里王于出征以佐天子

集傳曰比物齊其力也凡大事毛馬

而頒之軍事物馬而頒之毛馬齊其色物馬齊其力也三十里一舍也師行日三十里既比其物而曰四驪則

其色又齊可以見馬之有餘矣閑習之而皆中法則又可以見教之有素矣於是此月之中既成我服即日引道不徐不疾盡舍而止又見其應變之速從事之敏而不失其常度王命於此而出征欲其有以敵王所懷而佐天子耳

四牡修廣其大有顓薄伐玁狁以奏膚公有嚴有

翼共武之服共武之服以定王國

集傳曰顓大貌奏薦膚大公功嚴威翼敬

也共與供同言將帥皆嚴敬以共武事也

玁狁匪茹整居焦穫侵鎬及方至

于涇陽織文鳥章白旆央央元戎十乘以先啓行

集傳曰茹

度整齊也焦穫鎬方皆地名焦未詳所在穫郭璞以為瓠中則今在耀州三原縣也鎬劉向以為千里之鎬則非鎬京之鎬矣亦未詳所在方疑即朔方涇陽涇水之北在豐鎬之西北言其深入為寇織幟字同鳥章鳥隼

之章白旆繼旄者也。央央鮮明貌。戎戎車軍之前鋒。啓開行道猶言發程也。言獵狁不自度量深入為寇如此。是以建此旌旗選鋒銳進聲其罪而致討。戎車既安如馬直而壯律而臧有所不戰戰必勝矣。

輕如軒四牡既佶既佶且閑薄伐獵狁至于太原文武

吉甫萬邦為憲

集傳曰輕車之覆而前軒車之却而後凡車從後視之如輕從前視之如軒然

後適調也。佶壯健貌。太原地名亦曰大鹵。今在太原府陽曲縣。至于太原言逐出之而已不窮追也。先王治戎狄之法如此。吉甫尹吉甫此時大將也。非文無以附。吉衆非武無以威敵。能文能武則萬邦以之為法也。

甫燕喜既多受祉來歸自鎬我行永久飲御諸友包鼈

膾鯉侯誰在矣張仲孝友

集傳曰御進侯維也。張仲吉甫之友也。此言吉甫燕飲喜

樂多受福祉蓋以其歸自鎬而行永久也是以飲酒進饌於朋友而孝友之張仲在焉言其所與燕者之賢所以賢吉甫而善是燕也○朱子曰成康既沒周室寢衰八世而厲

王胡暴虐周人逐之出居于彘獫狁內侵逼近京邑王崩子宣王靖即位命尹吉甫帥師伐之有功而歸詩人作歌以敘其事

燕惠侯薨子莊嗣

是為僖侯

二年以方叔為將南征荆蠻

采芑之詩曰薄言采芑于彼新田于此菑畝方叔涖止

其車三千師干之試方叔率止乘其四騏四騏翼翼路

車有奭輦茀魚服鉤膺鞶革

集傳曰芭即今苦蕒菜軍行采之人馬皆可食田一

歲曰蓄二歲曰新田三歲曰畲方叔宣王卿士受命為將者其車三千法當用三十萬衆蓋兵車一乘甲士三人步卒七十二人又二十五人將重車在後凡百人也此極其盛而言未必實有此數也師衆干扞試肄習也言衆且練也率總率之也翼翼順序貌奭赤貌輦茀以方文竹輦為車蔽也魚獸名似猪東海有之其皮可為弓韃矢服鉤膺馬婁頷有鉤而在膺有樊有纓樊馬大帶纓鞅也降轡也革轡首也馬轡所把之外有餘而垂者也宣王之時蠻荊背叛王命方叔南征軍行采芭而食故賦其事以起興曰薄言采芭則于彼新田于此蓄畝矣方叔蒞止則其車三千師干之試薄言采芭于彼矣又遂言其車馬之美以見軍容之盛

薄言采芭于彼

新田于此中鄉方叔泣止其車三千旂旄央央方叔率  
止約軹錯衡八鸞瑒瑒服其命服朱芾斯皇有瑒葱珩  
集傳曰中鄉民居其田尤治約束軹轂也以皮纏束兵  
車之轂而朱之也錯文也鈴在鑣曰鸞馬口兩旁各一  
四馬故八也瑒瑒聲也命服天子所命之服朱芾黃朱  
之芾皇猶煌煌瑒玉聲葱蒼色如葱珩佩首橫玉禮三  
命赤芾 駢彼飛隼其飛戾天亦集爰止方叔泣止其車  
葱珩

三千師干之試方叔率止鉦人伐鼓陳師鞠旅顯允方

叔伐鼓淵淵振旅闐闐

集傳曰駢疾飛貌隼鷃屬急疾之鳥鉦鐃也獨也伐擊也鉦以

靜之鼓以動之鉦鼓各有人而言鉦人伐鼓互文也鞠  
告也二千五百人為師五百人為旅此言將戰陳其師



旅而誓告之陳師鞠旅亦互文淵淵鼓聲平和不暴怒也謂戰時進士衆也振止旅衆也言戰罷而止其衆以入也闐闐亦鼓聲或曰盛貌程子曰振旅亦以鼓行金止言隼飛戾天而亦集於所止以興師旅之盛而進退有節如下

蠢爾蠻荆大邦為讎方叙元老克壯其猶方

文所云

叔率止執訊獲醜戎車嘽嘽嘽嘽如霆如雷顯允

方叔征伐獫狁蠻荆來威

集傳曰蠢動而無知之貌蠻荆荆州之蠻大邦猶言中國

元大猶謀也言方叔雖老而謀則壯也嘽嘽衆也嘽嘽盛也霆疾雷也方叔蓋嘗與於北伐之功者是以蠻荆聞其名而皆來畏服也

## 命名虎征淮夷

大雅江漢之詩曰江漢浮浮武夫滔滔匪安匪遊淮夷

來求既出我車既設我旗匪安匪舒淮夷來鋪

集傳曰宣王命

召穆公平淮南之夷詩人美之浮浮水盛貌滔滔順流貌淮夷夷在淮上者鋪陳也陳師以伐之此章總叙其事言行者莫敢安徐而曰吾之來也惟淮夷是求是伐耳江漢湯湯武夫洸洸經營

四方告成于王四方既平王國庶定時靡有爭王心載

寧

集傳曰洸洸武貌庶幸也此章言既伐而成功

江漢之潁王命召虎式辟四

方徹我疆土匪疚匪棘王國來極于疆于理至于南海

集傳曰虎召穆公名也辟與闢同徹井其田也疚病棘急也極中之表也居中而為四方所取正也言江漢既

平王又命召公闢四方之侵地而治其疆界非病之非  
急之但使其來取正於王國而已於是遂疆理之盡南  
海而止也王命召虎來旬來宣文武受命召公維翰無曰予

小子召公是似肇敏戎公用錫爾祉

集傳曰旬徧宣布也自江漢之詩言

之故曰來召公召康公奭也翰幹也予小子王自稱肇  
開戎女公功也又言王命召虎來此江漢之詩徧治其  
事以布王命而曰昔文武受命惟召公為楨幹今女無  
曰以予小子之故也但自為嗣女召公之事耳能開敏  
女功則我當錫女以釐爾圭瓚秬鬯一卣告于文人錫  
祉福如下章所云也

山土田于周受命自召祖命虎拜稽首天子萬年

集傳曰釐

賜卣尊也文人先祖之有文德者謂文王也周岐周也  
召祖穆公之祖康公也此叙王錫召公策命之詞言錫

爾圭瓚秬鬯者使之以祀其先祖又告于文人而錫之山川土田以廣其封邑蓋古者爵人必於祖廟示不敢專也又使往受命於岐周從其祖康公受命於文王之所以寵異之而召公拜稽首以受王命之策書也人臣受恩無可以報謝但言使君壽考而已

虎拜稽首對揚王休作召公考天

子萬壽明明天子令聞不已矢其文德洽此四國

集傳曰穆

公既受賜遂答稱天子之美命作康公之廟器而勒王策命之詞以考其成且祝天子以萬壽也既又美其君之令聞而進之以不已勸其君以文德而不欲其極意於武功古人愛君之心於此可見矣

### 王伐淮徐

大雅常武之詩曰赫赫明明王命卿士南仲大祖大師

皇父整我六師以修我戎既敬既戒惠此南國

集傳曰宣王自

將以伐淮北之夷詩人美之卿士即皇父之官南仲周  
大將大祖始祖也大師皇父之兼官我宣王自我戎兵  
器也王命卿士之謂南仲為大祖兼大師而字皇父者  
整治其從行之六軍修其戎事以除淮夷之亂而惠此  
南方之國必言南仲大祖稱其世功以美大之王謂尹氏命程伯休父左右陳

行戒我師旅率彼淮浦省此徐土不留不處三事就緒

集傳曰尹氏吉甫也蓋為內史掌策命卿大夫也程伯  
休父周大夫三事未詳或曰三農之事也言王詔尹氏  
策命程伯休父為司馬使之左右陳其行列循淮浦而  
省徐州之土蓋伐淮北徐州之夷也上章既命皇父而  
此章又命程伯休父蓋王親命大師以三公赫赫業業  
治其軍事而使內史命司馬以六卿副之耳

有嚴天子王舒保作匪紹匪遊徐方繹騷震驚徐方如

雷如霆徐方震驚

集傳曰赫赫顯也業業大也嚴威也天子自將其威可畏王舒保作未詳

其義或曰舒徐保安作行也言王師舒徐而安行也紹糾緊也遊遨遊繹連絡騷擾動也夷厲以來周室衰弱至是而天子自將以征不庭其師始出不疾不遲而徐方之人皆已震動如雷霆作於其上不遑安矣王

奮厥武如震如怒進厥虎臣闚如虢虎鋪敦淮漬仍執

醜虜截彼淮浦王師之所

集傳曰進鼓而進之也闚奮怒之貌虢虎之自怒也鋪布

也布其師旅也敦厚也厚集其陳也仍就也老子曰攘臂而仍之截截然不可犯之貌

王旅嘽嘽

如飛如翰如江如漢如山之苞如川之流緜緜翼翼不

測不克濯征徐國

集傳曰嘽嘽衆盛貌翰羽苞本也如飛如翰疾也如江如漢衆也如山不

可動也如川不可禦也絲絲不可絕也翼翼不可亂也不測不可知也不克不可勝也濯大也王猶允

塞徐方既來徐方既同天子之功四方既平徐方來庭

徐方不回王曰還歸

集傳曰猶道庭朝回違還歸班師而歸也前篇召公帥師以出歸告

成功故備載其褒賞之詞此篇王實親行故於卒章反復其辭以歸功於天子言王道甚大而遠方懷之非獨兵威然也序所謂因以為戒者是也

魯真公薨弟敖立

是為武公

世家曰魏公潰卒子厲公擢立厲公卒弟獻公具立獻

公卒子真公湏立

曹公子蘇弑其君幽伯而自立

是為戴伯

三年齊武公薨子無忌嗣

是為厲公

五年晉僖侯薨子籍嗣

是為獻侯

六年大旱

大紀連年書旱

大雅雲漢之詩曰倬彼雲漢昭回于天王曰於乎何辜今之人天降喪亂饑饉薦臻靡神不舉靡愛斯牲圭璧

既卒寧莫我聽

集傳曰舊說以為宣王承厲王之烈內有撥亂之志遇裁而懼側身修行欲消



去之天下喜於王化復行百姓見憂故仍叔作此詩以  
美之雲漢天河也昭光回轉也言其光隨天而轉也薦  
荐通重也靡神不舉所謂國有凶荒則索鬼神而祭之  
也圭璧禮神之玉卒盡也寧猶何也言雲漢者夜晴則  
天河明故述王仰  
訴於天之詞如此

旱既大甚蘊隆蟲蟲不殄禋祀自郊

徂宮上下奠瘞靡神不宗后稷不克上帝不臨耗斁下

土寧丁我躬

集傳曰蘊蓄隆盛蟲蟲熱氣也郊祀天地  
宮宗廟也上祭天下祭地奠其禮瘞其物

宗尊也克勝也言后稷欲救此旱災而不能勝也稷以  
親言帝以尊言丁當也何以當我之身而有是災也或  
曰與其耗斁下土寧使  
災害當我身也亦通

旱既大甚則不可推兢兢業業

如霆如雷周餘黎民靡有孑遺昊天上帝則不我遺胡

不相畏先祖于摧

集傳曰推去也兢兢恐也業業危也如霆如雷畏之甚也子無右臂貌言

大亂之後周之餘民無復有半身之遺者而上天又降旱災使我亦不見遺也摧滅也言先祖之祀將自此而

滅也旱既大甚則不可沮赫赫炎炎云我無所大命近止

集傳

靡瞻靡顧羣公先正則不我助父母先祖胡寧忍予

集傳

曰沮止也無所無所容也大命近止死將至也瞻仰顧望也羣公先正月令所謂雩祀百辟卿士之有益於民

者以祈穀實者也於羣公先正但言其不見助至旱既

父母先祖則以恩望之矣所謂垂涕泣而道之也

大甚滌滌山川旱魃為虐如惓如焚我心憚暑憂心如

熏羣公先正則不我聞昊天上帝寧俾我遯

集傳曰滌滌言山無

木川無水如滌而除之也遯逃也言天又不肯使我得逃遯而去也旱既大甚黽勉畏去

胡寧瘖我以旱憯不知其故祈年孔夙方社不莫昊天

上帝則不我虞敬恭明神宜無悔怒

集傳曰黽勉畏去出無所之也瘖病

惜曾也祈年孟春祈穀于上帝孟冬祈來年于天宗是也方祭四方也社祭土神也虞度也言天曾不度我之心如我之敬事明神宜可以無恨怒也旱既大甚散無友紀鞠哉庶正疚

哉冢宰趣馬師氏膳夫左右靡人不周無不能止瞻卬

昊天云如何里

集傳曰友紀猶言綱紀或曰友疑作有庶正衆官之長冢宰又衆長之長也趣

馬掌馬之官師氏掌以兵守王門者膳夫掌食之官歲凶年穀不登則趣馬不秣師氏弛其兵馳道不除祭事

不縣膳夫徹膳左右布而不修大夫不食梁士飲酒不樂周救也無不能止言諸臣無有一人不周救百姓者無有自言不能而遂止不為也里憂也與漢書無俚之俚同聊賴之意

瞻卬昊天有嘽其

星大夫君子昭假無羸大命近止無棄爾成何求為我

以戾庶正瞻卬昊天曷惠其寧

集傳曰久旱而仰天以望雨則有嘽然之明星

未有雨徵也然羣臣竭其精誠而助王以昭假于天者已無餘矣雖今死亡將近然不可以棄其前功當益求所以昭假者而修之固非求為我之一身而已乃所以定衆正也於是語終又仰天而訴之曰果何時而惠我以安寧乎張子曰不敢斥言雨者畏懼之甚且不敢必云爾

秦仲伐西戎死之王命其子莊伐戎破之

秦紀曰西戎殺秦仲秦仲立二十三年死於戎有子五人其長者曰莊公周宣王乃召莊公昆弟五人與兵七千使伐西戎破之於是復予秦仲後及其先大駱地犬丘并有之為西垂大夫莊公居其故西犬丘○秦國風

無衣之詩曰豈曰無衣與子同袍王于興師修我戈矛

與子同仇

集傳曰袍襖也戈長六尺六寸矛長二丈王于興師以天子之命而興師也秦人相謂曰

豈以子之無衣而與子同袍乎蓋以王于興師則將修我戈矛而與子同仇也秦人之俗大抵尚氣槩先勇力忘生輕死故見於詩如此豈曰無衣與子同澤王于興師修我矛戟

與子偕作

集傳曰澤裏衣也以其親膚近於垢澤故謂之澤戰車戰也長丈六尺

豈曰無

衣與子同裳王于興師修我甲兵與子偕行

楚熊霜卒弟熊徇立

世家曰楚熊霜元年周宣王初立卒三弟爭立仲雪死叔堪亡避難於濮而少弟季徇立是為熊徇

十有二年魯侯來朝以其子括與戲見王王以戲為魯太子魯武公薨戲立

是為懿公

王不籍千畝

史記曰十二年魯武公來朝宣王不修籍於千畝○國

語曰魯武公以括與戲見王王立戲

史記曰武公九年與長子括少子戲

西朝周宣王宣王愛戲欲立戲為太子

樊仲山甫諫曰不可立也不順必

犯犯王命必誅故出令不可不順也令之不行政之不

立行而不順民將棄上夫下事上少事長所以為順也

今天子立諸侯而建其少是教逆也若魯從之而諸侯

效之王命將有所壅若不從而誅之是自誅王命也是

事也誅亦失不誅亦失天子其圖之王卒立之○又曰

宣王不籍千畝虢文公諫曰不可夫民之大事在農上

帝之粢盛於是乎出民之蕃庶於是乎生事之共給於是乎在和協輯睦於是乎興財用蕃殖於是乎始敦龐純固於是乎成是故稷為大官古者大史順時視土陽

瘠

丁佐反

墳盈土氣震發農祥晨正日月底于天廟

韋昭曰農

祥房星也立春之日晨中於午農事之候故曰農祥天廟營室也孟春日月會于營室

土乃脉發

先時九日太史告稷曰自今至于初吉陽氣俱烝土膏其動弗震弗渝脉其滿膏穀乃不殖稷以告王曰史帥陽官以命我司事曰距今九日土其俱動王其祗被監



農不易王乃使司徒咸戒公卿百吏庶民司空除壇于

籍命農大夫咸戒農用先時五日瞽告有協風至王即

齊宮百官御事各即其齊三日王乃淳濯饗醴及期鬱

人薦鬯犧人薦醴王裸鬯饗醴乃行百吏庶民畢從及

籍后稷監之膳夫農正陳籍禮大史贊王王敬從之王

耕一墦鉢伐二音班三之庶人終于千畝其后稷省功大史

監之司徒省民大師監之畢宰夫陳饗膳宰監之膳夫

贊王王歆大牢班嘗之庶人終食是日也瞽帥音官以

省風土廩于籍東南鍾而藏之而時布之于農稷則徧  
誠百姓紀農協功曰陰陽分布震雷出滯土不備墾辟  
在司寇乃命其旅曰狗農師一之農正再之后稷三之  
司空四之司徒五之太保六之太師七之太史八之宗  
伯九之王則大狗耨穫亦如之民用莫不震動恪恭于  
農修其疆畔日服其耨不解于時財用不乏民用和同  
是時也王事惟農是務無有求利於其官以干農功三  
時務農而一時講武故征則有威守則有財若是則能

媚於神而和於民矣則享祀時至而布施優裕也今天子欲修先王之緒而棄其大功置神之祀而困民之財將何以求福用民王弗聽

齊胡公子弑厲公齊人誅之而立厲公之子赤

是為文公誅弑君者七十人

世家曰厲公暴虐故胡公子復入齊齊人欲立之乃與攻殺厲公胡公子亦戰死齊人乃立厲公子赤為君是為文公而誅殺厲公者七十人

十有五年衛釐侯薨少子和嗣

是為武公

世家曰釐侯卒太子共伯餘立共伯弟和有寵於釐侯多予之賂和以其賂賂士攻共伯於墓上共伯入釐侯羨自殺衛人因葬之釐侯旁謚曰共伯而立和為衛侯是為武公武公修康叔之政百姓和集○稽古錄曰衛僖侯薨太子共伯早死立其弟和○詩序曰柏舟共姜自誓也衛世子共伯蚤死其妻守義父母欲奪而嫁之誓而弗許故作是詩以絕之詩曰汎彼柏舟在彼中河

髡彼兩髦實維我儀之死矢靡他母也天只不諒人只

集傳曰髡髮垂貌兩髦剪髮夾囟子事父母之節親死然後去之蓋指共伯也我共姜自我也儀匹也言柏舟則在彼中河兩髦則實我之匹雖至於死誓無它心母之於我覆育之恩如天固極而何其不諒我之心乎不及父者疑獨母在或非父意耳汎彼柏舟在彼河側髡彼兩髦實維我

特之死矢靡慝母也天只不諒人只○古史曰武公賢者衛人謂之睿聖武公奪適之事未可遽以誣之且詩序言共伯蚤死初無篡奪之文故史遷所載疑而不錄○子王子曰武公少年奪適之罪晚年進修之功功罪

自不相掩然武公少時必有俊邁之姿鍾愛於其父好  
施養士士以是置共伯於死以成武公之立則或有之  
為法受惡武公不能無罪其後共姜堅自誓之操武公  
亦有修革之學復康叔之政輸定難之忠晚年所至稱  
為睿聖是真有不可及者君子尚論固難以老少相掩  
也

十有六年晉獻侯薨子費生嗣徙都于絳

是為穆侯

○史記凡穆  
字或作繆

十有八年蔡夷侯薨子所事嗣

是為  
僖侯

二十有一年魯懿公兄括之子伯御弑其君懿

公而自立

二十有二年王后姜氏諫王

外紀係  
此年

列女傳曰周宣姜后賢而有德事非禮不言行非禮不  
動宣王嘗早臥而晏起后夫人不出於房姜后既出乃  
脫簪珥待罪於永巷使其傅母通言於王曰妾不才妾  
之淫心見矣至使君王失禮而晏朝以見君王之樂色

而忘德也夫苟樂色必好奢好奢必窮樂窮樂者亂之所興也原亂之興從婢子起婢子生亂當服其辜敢請婢子之罪唯君王之命王曰寡人不德寔自生過過從寡人起非夫人之罪也遂復姜后而勤於政事早朝晏退繼文武之迹興周室之業卒成中興之功為周世宗

封弟友于鄭

鄭本西周畿內采邑其後東徙國于鄆號之間為鄭又其遺民南保

漢中者為南鄭

史記世家曰鄭桓公友者周厲王少子而宣王庶弟也



年表云  
母弟

宣王立二十二年友初封于鄭

二十有三年晉侯伐條生太子仇

二十有四年齊文公薨子說嗣

是為成公

二十有六年晉師戰于千畝生子成師

左氏曰晉穆侯之夫人姜氏以條之役生太子命之曰仇其弟以千畝之戰生命之曰成師師服曰異哉君之名子也夫名以制義義以出禮禮以體政政以正民是以政成而民聽易則生亂嘉耦曰妃怨耦曰仇古之命

也今君命太子曰仇弟曰成師始兆亂矣兄其替乎

愚按

師服初意蓋防奪嫡之漸耳仇即文侯異日受平王鉅  
鬯圭璫之命兄固未遽替也其後曲沃之封在昭侯之  
世師服之言防微慮漸始切事實而曲沃終至  
奪宗故後人服其先見併記其初命名之言云

二十有七年宋惠公薨子嗣

是為哀公

二十有八年宋哀公薨子嗣

是為戴公

楚熊狗卒子熊罥嗣

三十有二年春王伐魯誅伯御立懿公之弟稱

是為孝公

國語曰三十二年春宣王伐魯立孝公諸侯從是而不

睦○又曰宣王欲得國子之能導訓諸侯者

賈逵注國子諸侯之

嗣子韋昭曰國子謂同姓諸姬也導訓諸侯謂為州伯

樊穆仲曰魯侯孝

穆仲仲山父之

謚

王曰何以知之對曰肅恭明神而敬事耆老賦事行

刑必問於遺訓而咨於故實不干所問不犯所咨王曰

然則能訓治其民矣乃命魯孝公於夷宮

祖夷王廟也

○世

家曰宣王伐魯殺伯御問魯公子能導訓諸侯者以為

魯後樊穆仲曰魯懿公弟稱

云云語同國語

宣王曰然能訓治

其民矣乃立稱於夷宮

二出大同小異  
世家似得之

陳僖公薨子靈嗣

是為武公

曹戴伯薨子兕嗣

是為惠伯

三十有三年齊成公薨子贖嗣

是為莊公

三十有七年燕僖侯薨子嗣

是為頃侯

楚熊罥卒子熊儀嗣

是為若敖

三十有九年伐姜戎王師敗績于千畝

國語與不籍千

畝同事非也不籍千畝天子之籍田也此千畝地名也

四十年料民于太原

國語曰宣王既喪南國之師

注謂即姜戎唐固曰南陽也

乃料民于

太原

太原即今原州

仲山甫諫曰民不可料也夫古者不料民

而知其少多司民協孤終

協考比也孤幼也終死也

司商協名姓

今五

音姓氏是也古者置官別生分類官謂之司商者沈括曰商者人聲也故以律協民姓名者焉

司徒協

旅

協民衆為師旅

司寇協姦

考比罪隸刑死之類

牧協職

物色之數

工協革

牛馬

羊之場協入

知粟數

廩協出

知用數

是則少多死生出入往

來者皆可也於是又審之以事

事即下文籍田蒐狩簡知其數

王治

農于籍蒐于農隙耨穫亦于籍獮于既烝狩于畢時是  
皆習民數者也又何料焉不謂其少而大料之是示少  
而惡事也臨政示少諸侯避之治民惡事無以賦令且  
無故而料民天之所惡也害於政而妨於後嗣王卒料  
之及幽王乃滅

四十有三年殺杜伯

周春秋曰宣王殺杜伯而不辜後三年宣王會諸侯田  
于囿日中杜伯起於道左衣朱衣朱冠操朱弓朱矢射

王中心折脊而死

此說似怪見國語注大紀取之

○傳注曰杜伯為宣

王大夫宣王殺之其子隰叔奔晉

晉穆侯薨弟殤叔自立太子仇出奔

四十有六年王崩太子湮踐位

稽古錄曰宣王能慎微接下用賢使能羣臣無不自盡  
以奉其上內修政事外固邊圉復文武之竟土周室中  
興焉

履祥按周自厲王亂政日久紀綱板蕩宣王初年有  
志撥亂董生謂其周道粲然復興然攷之諸書似不

克終者如廢魯適不籍千畝喪師南國料民太原殺杜伯而非其罪大畧可見其後幽王繼之不踰十年而君弑國亡卒以東遷夫撥亂世反之正非百倍其功不足以興廢補弊況宣王末政止於如此哉傳謂夷厲宣幽而貪天禍不為無謂矣

庚申幽王元年晉太子仇襲殺殤叔而立

是為文侯

陳武公薨子說嗣

是為夷公

三年始嬖褒姒涇渭洛竭岐山崩

按國語以為幽王三年獨

史記拘於國亡不過十年之說係之二年今據國語為正

本紀曰初褒人有罪請入女子於王以贖罪是為褒姒



幽王三年入後宮見而愛之生子伯服○國語曰幽王

三年西周三川皆震伯陽父曰

唐固曰伯陽父周柱下史老子也

周將

亡矣夫天地之氣不失其序若過其序民之亂也陽伏而不能出陰迫而不能烝於是地震今三川實震是

陽失其所而鎮陰也

韋氏曰鎮為陰所鎮竿也

陽失而在陰源必塞

源塞國必亡夫水土演而民用足也土無所演民乏財用不亡何待昔伊洛竭而夏亡河竭而商亡今周德若二代之季矣其川源又塞塞必竭夫國必依山川山崩

川竭亡之徵也川竭山必崩若國亡不過十年數之紀也夫天之所棄不過其紀是歲也三川竭岐山崩十一年幽王乃滅周乃東遷

四年陳夷公薨弟燮立

是為平公

秦莊公卒子嗣

是為襄公

秦紀曰莊公之子世父曰戎殺我大父我非殺戎王則不敢入邑遂將擊戎讓其弟襄公襄公為太子莊公卒襄公立

甲子五年廢申后及太子宜臼以褒姒為后伯服為太子

史蘇曰周幽王伐有褒褒人以褒姒女焉褒姒有寵生伯服於是乎與虢石甫比逐太子宜臼而立伯服太子出奔申申人繒人召西戎以伐周周於是乎亡○小雅白華之詩曰白華菅兮白茅束兮之子之遠俾我獨兮

集傳曰幽王娶申后又得褒姒而黜申后故申后作此詩白華野菅也已漚為菅之子斥幽王俾使也我申后自我言白華為菅則白茅為束二物至微猶必相須為用何之子之遠而俾我獨耶  
英英白雲露

彼管茅天步艱難之子不猶

集傳曰英英輕明貌白雲水土輕清之氣當夜而上

騰者露即其散而下降者也步行也天步猶言時運猶圖也或曰猶如也言雲之澤物無微不被今時運艱難而之子不圖不如漉池北流浸彼稻田嘯歌傷懷念彼白雲之露管茅也

碩人

集傳曰漉流貌北流豐鎬之間水多北流碩人尊大之稱亦謂幽王也言小水微流尚能浸灌王之

尊大而反不能通其寵澤所以使我嘯歌傷懷而念之也樵彼桑新卽烘于熤維彼

碩人實勞我心

集傳曰桑薪薪之善者也卽我烘燎也熤無釜之竈可燎而不可烹飪者也桑

薪宜以烹飪而但為燎燭以比嫡后之尊而反見卑賤也鼓鐘于宮聲聞于外念子

惓惓視我邁邁

集傳曰惓惓憂貌邁邁不顧也鼓鐘于宮則聲聞于外矣念子惓惓而反視我

邁邁有鵲在梁有鶴在林維彼碩人實勞我心集傳曰鵲禿鵲

梁魚梁蘇氏曰鵲鶴皆以魚為食然鶴之於鵲清濁則有間矣今鵲在梁而鶴在林鵲則飽而鶴則饑矣幽王進褻姒而黜申后譬鵲鵲在梁戢其左翼之子無良二之養鵲而棄鶴也

三其德

集傳曰戢其左翼言不失其常也二三其德則鵲鵲之不如矣

有扁斯石履之

卑兮之子之遠俾我底兮

集傳曰扁卑貌底病也有扁然而卑之石則履之者亦卑

矣如妾之賤則寵之者亦賤矣是以之子之遠而俾我底也

○小弁之詩曰弁彼鵲

斯歸飛提提民莫不穀我獨于罹何辜于天我罪伊何

心之憂矣云如之何

集傳曰幽王太子宜臼被廢而作此詩弁飛附翼貌鵲雅鳥小而多

羣江東呼為鴨鳥斯語詞提提羣飛安閒貌言弁彼鸛斯則歸飛提提矣民莫不善而我獨于憂則鸛斯之不如也何辜于天我罪伊何者怨而慕也舜號泣于旻天曰父母之不我愛於我何哉蓋如此矣心之憂矣云如之何則知其無可奈何而安之之詞也

踽踽周道鞠為茂草我心憂傷惄

焉如擣假寐永嘆維憂用老心之憂矣疾如疾首

集傳曰踽

踽平易也周道大道也鞠窮惄思擣春也不脫衣冠而寐曰假寐疾猶疾也踽踽周道則將鞠為茂草矣我心憂傷則惄焉如擣矣精神憤耗至於假寐之中而不忘永嘆憂之之深是以未老而老也疾如疾首則又憂之甚矣維桑與梓必恭敬止靡瞻匪父靡依匪母不屬于毛

不離于裏天之生我我辰安在

集傳曰桑梓五畝之宅樹之牆下以遺子孫給

蠶食具器用者也。瞻者尊而仰之，依者親而倚之，屬連也。毛，膚體之餘氣末屬也。離麗也。裏，心腹也。辰猶時也。言桑梓父母所植尚且必加恭敬，況父母至尊至親，宜莫不瞻依也。然父母之不我愛，豈我不屬於父母之毛乎？豈我不離于父母之裏乎？無所歸咎，則推之於天曰：「豈我生時不善哉？何不祥至是也。」  
鳴蜩嘒嘒有淮者，淵萑葦淠淠，譬彼舟流，不知所屆，心

之憂矣，不遑假寐。

集傳曰：萑，茂盛貌。蜩，蟬也。淮，深貌。淠，淠衆也。苑，彼柳斯則鳴蜩嘒嘒矣。有

淮者，淵則萑葦淠淠矣。今我獨見棄逐如舟之流于水中，不知其何所至乎？是以憂之之深。昔猶假寐而今不暇也。  
鹿斯之奔，維足伎伎。雉之朝雊，尚求其雌。譬彼壞木

疾用無枝，心之憂矣，寧莫之知。

集傳曰：伎伎，舒貌。宜疾而舒，留其羣也。雉，雄鳴。

壞傷病鹿斯之奔則足伎伎然雉之朝雖亦知求其妃匹今我獨見棄逐如傷病之木憔悴而無枝是以憂之而人莫之知也相彼投兔尚或先之行有死人尚或堽之君子

秉心維其忍之心之憂矣涕既隕之

集傳曰投奔行道堽埋也相彼被逐

而投人之兔尚或有哀其窮而先脫之者道有死人尚或有哀其暴露而埋藏之者蓋皆有不忍之心焉今王信讒棄逐其子曾視投兔死人之不如君子信讒如或則其秉心亦忍矣是以心憂而涕隕也

醕之君子不惠不舒究之伐木倚矣析薪杙矣舍彼有

罪予之佗矣

集傳曰醕報倚倚也以物倚其巔也杙隨其理也佗加也言王惟讒是聽如受醕爵

得即飲之曾不加惠愛舒緩而究察之夫苟舒緩而究察之則讒者之情得矣伐木者尚倚其巔析薪者尚隨



其理皆不妄挫折之今乃舍彼有罪之諧人而加我以非其罪曾伐木析薪之不若也

莫高匪山

莫浚匪泉君子無易由言耳屬于垣無逝我梁無發我

筍我躬不閱遑恤我後

集傳曰山極高矣而或陟其巔泉極深矣而或入其底故君子

不可易於其言恐耳屬于垣者有所觀望左右而生讒譖也王於是卒以褻姒為后伯服為太子故告之曰無逝我梁無發我筍我躬不閱遑恤我後也○高子曰小弁小人之詩也孟子

曰何以言之曰怨曰固哉高叟之為詩也有人於此越人關弓而射之則已談笑而道之無他疏之也其兄關弓而射之則已垂涕泣而道之無他戚之也小弁之怨

親親也親親仁也固矣夫高叟之為詩也曰凱風何以  
不怨曰凱風親之過小者也小弁親之過大者也親之  
過大而不怨是愈疏也親之過小而怨是不可磯也愈  
疏不孝也不可磯亦不孝也孔子曰舜其至孝矣五十  
而慕

六年十月辛卯朔日有食之

小雅十月之交篇曰十月之交朔日辛卯日有食之亦  
孔之醜彼月而微此日而微今此下民亦孔之哀

集傳  
曰十

月以夏正言之建亥之月也交日月交會謂晦朔之間也歷法周天三百六十五度四分度之一左旋於地一晝一夜則其行一周而又過一度日月皆右行於天一晝一夜則日行一度月行十三度十九分度之七故日一歲而一周天月二十九日有奇而一周天又逐及於日而與之會一歲凡十二會方會則月光都盡而為晦已會則月光復蘇而為朔朔後晦前各十五日日月相對則月光正滿而為望晦朔而日月之合東西同度南北同道則月亢日而月為之食是皆有常度矣然王者修德行政用賢去姦能使陽盛足以勝陰陰衰不能侵陽則日月之行雖或當食而月常避日故其遲速高下必有參差而不正相合不正相對者所以當食而不食也若國無政不用善使臣子背君父妾婦乘其夫小人陵君子外蕃侵邊塞則陰盛陽微當食必食雖曰行有常度而實為非常之變矣蘇氏曰日食天變之大者也然正

陽之月古尤忌之夏之四月為純陽故謂之正月十月純陰疑其無陽故謂之陽月純陽而食陽弱之甚也純陰而食陰壯之甚也微虧也彼月則宜有時而虧矣此日不宜虧而今亦虧是亂亡之兆也

日月告

凶不用其行四國無政不用其良彼月而食則維其常

此日而食于何不臧

集傳曰行道也凡日月之食皆有常度矣而以為不用其行者月不

避日失其道也然其所以然者則以四國無政不用善人故也如此則日月之食皆非常矣而以月食為常日食為不臧者陰亢陽而不勝猶可言也陰勝陽而掩之不可言也故春秋日食必書而月食則無紀焉亦以此

爾燿燿震電不寧不令百川沸騰山冢萃崩高岬為谷

深谷為陵哀今之人胡憯莫懲

集傳曰燿燿震電光貌寧安徐也令善沸出騰乘

也山頂曰冢率崔嵬也高岸崩陷故為谷深谷填塞故為陵惜曾也言非但日食而已十月而雷電山崩水溢亦災異之甚者是宜恐懼修省改紀其政而幽王曾莫之懲也董子曰國家將有失道之敗而天乃先出災異以譴告之不知自省又出怪異以警懼之尚不知變而傷敗乃至此見天心仁愛人君而欲止其亂也

皇

父卿士番維司徒家伯冢宰仲允膳夫聚子內史蹶維

趣馬禡維師氏豔妻煽方處

集傳曰皇父家伯仲允皆字也番聚蹶禡皆氏也卿

士六卿之外更為都官以總六官之事也或曰卿士蓋卿之士周禮太宰之屬有上中下士公羊所謂宰士左氏所謂周公以蔡仲為已卿士是也蓋以宰屬而兼總六官位卑而權重也司徒掌邦教冢宰掌邦治皆卿也膳夫上士掌王之飲食膳羞者也內史中大夫掌爵祿廢置殺生予奪之法者也趣馬中士掌王馬之政者也

師氏亦中大夫掌司朝得失之事者也美色曰豔豔妻  
即襄姒也煽熾也方處方居其所未變徙也言所以致  
變異者由小人用事於外而嬖妾  
蠱惑王心於內以為之主故也抑此皇父豈曰不時

胡為我作不即我謀徹我牆屋田卒汙萊曰予不戕禮

則然矣

集傳曰抑發語詞時農隙之時作動即就卒盡  
也汙停水萊草穢戕害也言皇父不自以為不

時欲動我以徙而不與我謀乃遽徹我牆屋使我田不  
獲治卑者汙而高者萊又曰非我戕汝乃下供上役之  
常禮耳皇父孔聖作都于向擇三有事亶侯多藏不憖遺

一老俾守我王擇有車馬以居徂向

集傳曰孔甚聖通  
明都大邑也周禮

畿內大都方百里小都方五十里皆天子公卿所封向  
地名在東都畿內今孟州河陽縣是也三有事三卿也

亶信侯維藏蓄也然者心不欲而自強之詞有車馬者亦富民也徂往也言皇父自以為聖而作都則不求賢而但取富人以為卿又不自強留一人以衛天子但有車馬者則悉與俱往不忠於上而但知貪利以自私也

黽勉從事不敢告勞無罪無辜讒口囂囂下民之孽匪降自天噂沓背憎職競由人

集傳曰囂衆多貌孽災害噂聚沓重複職主競力也

言黽勉從皇父之役未嘗敢告勞也猶且無罪而遭讒然下民之孽非天之所為也噂沓沓多言以相說而背則相憎專力為此悠悠我里亦孔之痍四方有美我者皆由讒口之人耳

獨居憂民莫不逸我獨不敢休天命不徹我不敢傲我

友自逸

集傳曰悠悠憂也里居痾病羨餘逸樂徹均也當是之時天下病矣而獨憂我里之甚病且以

為四方皆有餘而我獨憂衆人皆得逸豫而我獨勞者以皇父病之而被禍尤甚故也然此乃天命之不均吾豈敢不安於所遇而必效我友之自逸哉 ○虞劄曰小雅十月之交日有食

之在周幽王六年

八年以鄭伯友為司徒

鄭語曰桓公為司徒甚得周衆與東土之人問於史伯曰王室多故余懼及焉其何所可以逃死史伯對曰王室將卑戎翟必昌不可偏也偏迫也當成周者南有荆蠻

申呂應鄧陳蔡隨唐北有衛燕翟鮮虞潞洛泉徐蒲西



有虞號晉隗霍揚魏芮東有齊魯曹宋滕薛鄒莒是非

王之支子母弟甥舅也則皆蠻荆戎翟之人也非親則

頑不可入也其濟洛河潁之間乎是其子男之國號鄆

為大號叔恃勢鄆仲恃險是皆有驕侈怠慢之心而加

之以貪冒君若以周難之故寄孥與賄焉不敢不許周

亂而弊是驕而貪必將背君君若以成周之衆奉辭伐

罪無不克矣若克二邑鄆蔽補丹依隈歷莘君之土也

若前莘後河右洛左濟

莘莘國也

主朱齔而食溱洧

朱齔山名修

典刑以守之唯是可以少固公曰南方不可乎對曰夫  
荊子熊嚴生子四人伯霜仲雪叔熊季紃叔逃難於濮  
而蠻季紃是立遠氏將起之禍又不克是天啓之心也  
又甚聰明和協蓋其先王臣聞之天之所啓十世不替  
夫其子孫必光啓土不可偏也且重黎之後也夫黎為  
高辛氏火正以淳耀惇大天明地德光昭四海故命之  
曰祝融其功大矣夫成天地之大功者其子孫未嘗不  
章虞夏商周是也虞幕能聽協風以成樂物生者也

之先所謂自幕至于瞽  
叟無違命者也韋說非

夏禹能單平水土以品處庶類

者也商契能和合五教以保于百姓者也周棄能播殖  
百穀䟽以衣食民人者也其後皆為王公侯伯祝融亦  
能昭顯天地之光明以生柔嘉材者也其後八姓於周  
未有侯伯佐制物於前代者昆吾為夏伯矣大彭豕韋  
為商伯矣當周未有已姓昆吾蘇顧溫董董姓酸夷豢  
龍則夏滅之矣彭姓彭祖豕韋諸稽則商滅之矣禿姓  
舟人則周滅之矣姁姓鄔鄔路偃陽曹姓鄒莒皆為采

衛或在王室或在夷翟莫之數也而又無令聞必不興矣斟姓無後融之興者其在芊姓乎芊姓夔越不足命也蠻芊蠻矣惟荆實有昭德若周衰其必興矣姜嬴荆芊實與諸姬代相干也姜伯夷之後也嬴伯翳之後也伯夷能禮於神以佐堯者也伯翳能議百物以佐舜者也其後皆不失祀而未有興者周衰其將至矣公曰謝西之九州何如

謝宣王之舅申伯之國今在南陽二千五百家為州

對曰其民沓

貪而忍不可因也惟謝邾之間其冢君侈驕其民怠沓

其君而未及周德若更君而周訓之是易取也且可長  
用也公曰周其弊乎對曰殆於必弊者太誓曰民之所  
欲天必從之今王棄高明昭顯而好讒慝暗昧惡角犀  
豐盈而近頑童窮固去和而取同夫和實生物同則不  
繼以它平它謂之和故能豐長而物生之若以同裨同  
盡乃棄矣故先王以土與金木水火雜以成百物是以  
和五味以調口剛四支以衛體和六律以聰耳正七體  
以役心平八索以成人建九紀以立純德

七體七竅也  
八索八體應

八卦九紀  
九臟也

合十數以訓百體出千品具萬方計億事材

兆物收經入行姦極故王者居九畝之田收經入以食

兆民周訓而能用之醵樂如一夫如是醵之至也於是

乎先王聘后於異姓求財於有方擇臣取諫工而講以

多物務和同也聲一無聽物一無文味一無果物一不

講

講校也

王將棄是類而與剽同天奪之明欲無弊得乎

夫號石父讒諂巧從之人也而立以為卿士與剽同也

棄聘后而立內妾好窮固也

固陋也

侏儒戚施寔御在側

近頑童也周法不昭而婦言是行用讒慝也不建立卿

士而妖試幸措行暗昧也是物也不可以久且宣王之

時有童謠曰厭弧箕服實亡周國於是宣王聞之有夫

婦鬻是器者王使執而戮之府之小妾生女而非王子

也懼而棄之此人也收以奔褒

此下有褒神化為二龍藏於櫝三代傳之厲

王發之化為玄黿入于王府童妾遭之遂生褒姒之說怪誕不取

褒姒有獄而以為入

于王王遂置之而嬖是女也使至於為后而生伯服天

之生此久矣其為毒也大矣將俟淫德而加之焉毒之

荀腊者其殺也滋速申繒西戎方強王室方騷將以縱  
欲不亦難乎王欲殺太子以成伯服必求之申申人弗  
畀必伐之若伐申而繒與西戎會以伐周周不守矣繒  
與西戎方將德申申呂方強其隩愛太子亦必可知也  
王師若在其救之亦必然矣王心怒矣虢公從矣凡周  
存亡不三稔矣君若欲避其難速規所矣時至而求用  
恐無及也公曰若周衰諸姬其孰興對曰臣聞之武實  
昭文之功文之祚盡武其嗣乎武王之子應韓不在其



在晉乎距險而鄰於小若加以德可以大啓公曰姜  
嬴其孰興對曰夫國大而有德者近興秦仲齊侯姜嬴  
之雋也且大其將興乎公說乃東寄孥與賄號鄆受之  
十邑皆有寄地幽王八年而桓公為司徒九年而王室  
始騷十一年而斃及平王末而秦晉齊楚代興秦景襄  
於是乎取周土晉文侯於是乎定天子齊莊僖於是乎  
小伯楚蚡冒於是乎始啓濮

履祥按史伯之言該矣周之士大夫大率多賢能守  
其職自幽厲聽用小人雖有賢士大夫在於其職而

無救於亡甚矣君心所係大也史伯之言紀錄者亦  
或有所附會其論和同謂幽王不能用衆而外專於  
虢石父內專於褒姒也其勸鄭伯寄孥於鄆虢蓋陰  
為取國之計而史謂鄆虢叛鄭鄭武公伐滅之夫寄  
孥賄以誘之伺隙而取之是術也而史不悟何哉於  
是南北之形勢在鄭而鄭在春秋亦無世無晉楚之  
爭矣

十有一年申侯與犬戎入寇戎弑王于驪山之  
下鄭伯友死之晉衛秦皆以兵來救平戎與鄭  
子掘突共立故太子宜臼

史記曰褒姒不好笑幽王欲其笑萬方致之不笑幽王

為烽燧大鼓有寇至則舉烽火諸侯悉至至而無寇褒  
姒乃大笑幽王說之為數舉燧火其後不信諸侯益亦  
不至幽王以號石父為卿用事國人皆怨石父為人佞  
巧善諛好利王用之又廢申后去太子也申侯怒與繒  
西夷犬戎攻幽王幽王舉燧火兵莫至遂殺幽王驪山  
下虜褒姒盡取周賂而去於是諸侯乃即申侯而共立  
故太子宜臼是為平王以奉周祀○鄭世家曰犬戎殺  
幽王於驪山下并殺桓公鄭人共立其子掘突是為武

公○衛世家曰衛武公四十二年犬戎殺周幽王武公將兵佐周平戎甚有功平王命武公為公○秦紀曰周幽王用褒姒廢太子數欺諸侯諸侯叛之西戎犬戎與申侯伐周殺幽王而秦襄公將兵救周戰甚力有功

履祥按史遷不考之於書故晉文侯仇之功不紀

劉道原曰汲冢紀年幽王死申侯立平王於申號公立王子余二王並立余為晉文侯所殺是為攜王與舊史不同

辛未平王元年王東遷雒邑始命秦列為諸侯  
取岐豐之地命衛侯和為公錫命晉侯鄭伯東  
取鄆號十邑國之

左氏曰我周之東遷晉鄭焉依

大紀謂鄭武公收其父  
散兵東迎平王于申

○史記年表曰平王元年東徙雒邑○本紀曰平王立  
東遷于雒邑辟戎寇平王之時周室衰微諸侯強并弱  
齊楚秦晉始大政由方伯○秦紀曰周辟犬戎難東徙  
雒邑襄公以兵送周平王平王封襄公為諸侯賜之岐

以西之地曰戎無道侵奪我岐豐之地秦能攻逐即有其地與誓封爵之襄公於是始國與諸侯通使聘享之禮○經世曰平王錫晉文秦襄命秦分岐西晉分河內

○書文侯之命篇曰王若曰父義和不顯文武克慎明

德昭升于上敷聞在下惟時上帝集厥命于文王

德指行而

言明指知而言一說謹德指行而言明德指知而言呂氏曰文武之精蘊平王何足以知之其言乃若知本原者蓋生長保傳之間老師宿儒之傳尚無差也平王徒舉其語而不能察爾降是則異端並作言帝王者始支矣蔡氏曰同姓故稱父文侯名仇義和其字不名尊之也愚按晉侯初名仇師服以為異今曰義和或其後改

之也父猶尚父亦惟先正克左右昭事厥辟越小大謀之謂蓋尊之也

猷罔不率從肆先祖懷在位

先正指文武之臣小大謀猷猶云文武之道大者小

者肆遂懷安也言文武以大德受命亦惟先正之臣又能左右之昭事之凡小大謨烈皆遵守而不失遂使成康以下先王鳴呼閔予小子嗣造天丕愆殄資澤于下得安厥位

民侵戎我國家純即我御事罔或者耆壽俊在厥服予則

罔克曰惟祖惟父其伊恤朕躬鳴呼有績予一人永綏

在位

造作愆譴殄絕純大伊誰也平王自言嗣位之初自造天之大譴言父死國敗由己致之惟資澤竭

於下民故犬戎得以侵伐我國家之大此戎禍之由也適我執事之人無有耆壽俊傑之在職者而予又無克

亂之才惟曰諸侯之在我祖父列者其誰恤我乎嗚呼使有能致績於予一人者則可以安吾位矣章內兩嗚呼大亂之餘不覺嘆傷之意也父義和汝克昭乃顯祖汝肇刑文武用

會紹乃辟追孝于前文人汝多修扞我于艱若汝子嘉乃祖唐叔也肇始刑法也謂文侯能昭光唐叔之功文武之道已墜而自文侯始能刑法之用會合諸侯立已以紹周之統使追孝於前文人汝多能修補扞衛我于艱危之交若汝文侯子所深嘉蓋平王望諸侯而不至故深有感於文侯也當時秦鄭衛皆來救而此獨歸於晉曰用會紹乃辟必文侯首倡大義會合之也王

曰父義和其歸視爾師寧爾邦用賚爾秬鬯一卣彤弓一彤矢百盧弓一盧矢百馬四匹父往哉柔遠能邇惠



康小民無荒寧簡恤爾都用成爾顯德

用黑黍鬯為酒釀

以香草卣中尊諸侯受錫命當告于祖廟故錫之弓矢乘馬皆所以賞之簡謂閔士恤謂愛民

○大紀

曰賜以河內附庸晉於是始大○蘇氏曰予讀文侯篇

知東周之不復興也宗周傾覆禍敗極矣平王宜若衛  
文公越句踐然今其書乃施施焉與平康之世無異春  
秋傳曰厲王之禍諸侯釋位以間王政宣王有志而後  
效官讀文侯之命知平王之無志也○呂氏曰風氣之  
推移治道之開塞必於其會而觀之此篇作於東遷之

初由此而上則為成康為文武由此而下則為春秋為戰國乃消長升降之交會也故法語舊典尚有一二未泯而陵遲傾墮之意亦已見於辭命之間矣平王東遷之初大雉未報王畧未復正君臣坐薪嘗膽之時奔亡之餘僅得苟安乃君臣釋然自以為足曰父義和其歸視爾師寧爾邦兵已罷矣曰用賚爾秬鬯一卣彤盧弓一矢百馬四匹功已報矣曰父往哉柔遠能邇惠康小民無荒寧教之以平世之政軍旅不復講矣曰簡恤爾

都用成爾顯德勉之以本邦之治王室無復事矣嗚呼  
周之君臣如此周其終於東乎

履祥按東遷之君臣皆非有中興之才志平王顛墮  
前儒固論之矣當是時定難立君惟秦晉鄭衛四國  
耳秦襄公與西戎世為不共戴天之讎其勢亦不兩  
立其與戎力戰固亦為己不獨為王室也平王以岐  
豐之地予之使之自取當時犬戎盤據岐豐之郊平  
王不得不以許秦秦亦不得不取之然西戎方熾父  
子力戰二十一年而始得之固不暇東畧矣觀其臚  
於郊祀則無王之心固可見也周室都洛則晉居河  
北表裏山河是為屏輔文侯固忠賢然其前有殤叔  
之難其後有曲沃之封晉之始替實自是始平王所  
望於文侯者亦固不以興復期之則其委任可知矣  
平王申出鄭武公娶于申武公當桓公敗亡之時收

合餘衆已不能全又散為南鄭而武公以婚姻之故迎王于申立之東取虢鄆以為已國此其志願已足矣獨衛武公之賢足以有為然觀平王戍申之志則其依鄭之心可推也想其柄任在於鄭武所以終平王之世鄭伯父子世於其職衛武雖賢其柄任未必在是況周自中葉以後其公卿之士大率可以守常而短於制變當是時厲幽再世失民而犬戎之禍又熾類非諸公所能獨辦自四國之外又未有至者或謂平王當時何不奉辭伐罪以討不至之國則王威可以振是不然當時周室之大患在犬戎而不在諸侯而召戎之大罪又在申侯而不在諸侯也制戎固不暇矣平王懷申侯全已之功又依鄭武申好之國捨申不伐則何以伐其餘諸侯而令之哉東遷君臣事勢如此此所以不復中興也

# 秦祠上帝於西時

時者峙土為高也

史記曰秦用騶駒黃牛羝羊各三祠上帝西時

年表曰立西時

祠白

○太史公曰余讀至犬戎敗幽王周東徙洛邑秦

襄公始封為諸侯作西時用事上帝僭端見矣禮曰天子祭天地諸侯祭其域內名山大川今秦雜戎翟之俗先暴戾後仁義位在藩臣而臚於郊祀君子懼焉

二年魯孝公薨子弗湟嗣

是為惠公

四年燕頃侯薨子嗣

是為哀侯

五年秦襄公伐戎至岐薨子嗣

是為文公○太宗時秦襄公冢

壞得銅鼎狀方而四足銘曰天王遷洛岐鄠錫公秦之幽宮鼎藏於中

宋戴公薨子司空嗣

是為武公

詩序曰自微子至于戴公其間禮樂廢壞有正考甫者得商頌十二篇於周之大師以那為首

六年燕哀侯薨子鄭侯嗣

七年楚若敖卒子熊坎嗣

是為霄敖

九年蔡僖侯薨子興嗣

是為共侯

秦東徙汧渭之會

史記曰秦襄公十二年伐戎至岐卒生文公元年  
居西垂宮三年文公以兵七百人東獵四年至汧渭之  
會曰昔周邑我先秦嬴於此後卒獲為諸侯乃卜居之  
占曰吉即營邑之

十有一年蔡共侯薨子嗣

是為戴侯

曹惠伯薨子石甫嗣其弟武弑之而自立

是為穆公

十有三年衛武公薨子揚嗣

是為莊公

楚左史倚相曰昔衛武公年數九十有五矣猶箴儆于

國曰自卿以下至于師長士苟在朝者無謂我老耄而  
舍我必恭恪於朝朝夕以交戒我聞一二之言必誦志  
而納之以訓道我在輿有旅賁之規位宁有官師之典  
倚几有誦訓之諫居寢有摯御之箴臨事有瞽史之道  
宴居有師工之誦史不失書矇不失誦以訓御之於是  
乎作懿戒以自儆也及其沒也謂之叡聖武公懿即今大雅抑  
詩也韋昭曰懿讀為抑侯包曰衛武公行年九十有五  
猶使人日誦是詩而不離於側董氏曰序說為刺厲王  
者誤矣



楚霄敖卒子熊昫嗣

是為  
蚡冒

十有四年曹穆公薨子終生嗣

是為  
桓公

十有五年秦作廊時

史記曰秦文公夢黃蛇自天下屬地其口止於廊衍文  
公問史敦敦曰此上帝之徵君其祠之於是作廊時用  
三牲郊祭白帝焉

十有六年陳平公薨子圉嗣

是為  
文公

十有八年秦初有史以紀事

秦紀曰秦文公十三年初有史以紀事民多化者○陳氏曰秦自秦仲至文公而后始有史僻遠晚興者也至於史法亦不盡循周制晉竹書曲沃莊伯十一年十一月則用夏正為歲首

本注云莊伯之十一年十一月隱公之元年正月也見左傳後序

而秦譜至宣公初志閏月又改歷矣

二十有一年秦伯大敗戎師收岐西之地自岐以東歸于王

本紀曰秦文公十六年以兵伐戎戎敗走於是文公收

周餘民有之地至岐岐以東獻之周

蔡戴侯薨子考父嗣

是為宣侯

二十有三年宋武公薨子力嗣

是為宣公

二十有五年晉文侯薨子伯嗣

是為昭侯

秦初有三族之罪

二十有六年晉侯封其叔父成師于曲沃

左氏曰晉始亂故封桓叔于曲沃靖侯之孫欒賁傳之師服曰吾聞國家之立也本大而末小是以能固故天

子建國諸侯立家卿置側室

注衆子也  
得立此官

大夫有貳宗士

有隸子弟今晉甸侯也而建國本既弱矣其能久乎

詩揚之水篇曰揚之水白石鑿鑿素衣朱褱從子于沃

既見君子云何不樂揚之水白石皓皓素衣朱繡從子

于鵠既見君子云何其憂揚之水白石粼粼我聞有命

不敢以告人

集傳曰晉昭侯封桓叔于曲沃其後  
沃盛強而晉微弱國人將叛而歸之

○椒

聊篇曰椒聊之實蕃衍盈升彼其之子碩大無朋椒聊  
且遠條且椒聊之實蕃衍盈菊彼其之子碩大且篤椒

聊且遠條且

陳與可曰椒指晉昭也彼其之子指曲沃也聊微畧之語也謂椒之微小其蕃衍不

過盈升而已而彼其之子則碩大無朋椒之聊小乎其能遠條乎以比晉昭之微弱而曲沃之碩大如此晉其能久遠乎序義失之

陳文公薨子鮑嗣

是為桓公

二十有七年鄭武公薨子寤生嗣

是為莊公

二十有八年鄭伯封其弟段于京

左氏曰初鄭武公娶于申曰武姜生莊公及其叔段莊公寤生驚姜氏故名寤生惡之愛段欲立之亟請於武

公弗許及莊公即位為之請制公曰制巖邑也號叔死  
焉佗邑唯命請京使居之謂之京城大叔祭仲曰都城  
過百雉國之害也先王之制大都不過參國之一中五  
之一小九之一今京不度非制也君將不堪公曰姜氏  
欲之焉辟害對曰姜氏何厭之有不如早為之所無使  
滋蔓蔓難圖也蔓草猶不可除况君之寵弟乎公曰多  
行不義必自斃子姑待之

莊公初意本美然不能處之  
祭仲只論利害不明義理莊

公因此乃有養成其惡之意

三十年衛公子州吁阻兵

左氏曰衛莊公娶于齊曰莊姜美而無子衛人所為賦碩人也戴嬀生桓公莊姜以為己子公子州吁嬖人之子也有寵而好兵公弗禁莊姜惡之石碻諫曰臣聞愛子教之以義方弗納於邪驕奢淫佚所自邪也四者之來寵祿過也

為父者本非欲納其子於邪為寵過而驕此子之所由邪也

將立州吁

乃定之矣若猶未也階之為禍夫寵而不驕驕而能降降而不憾憾而能眄者鮮矣

珍重也

且夫賤妨貴少陵長

遠間親新間舊小加大淫破義所謂六逆也君義臣行  
父慈子孝兄愛弟敬所謂六順也去順效逆所以速禍  
也君人者將禍是務去而速之母乃不可乎弗聽其子  
厚與州吁遊禁之不可桓公立乃老

楚蚡冒卒弟熊通弑太子而自立

是為武

世家曰蚡冒十七年卒弟熊通弑蚡冒子而代立是為

楚武王

其僭王在春秋  
之世語見世家

三十有二年晉大臣潘父弑其君昭侯納曲沃



成師不克國人立昭侯之子平

是為孝侯

潘父伏誅

世家曰昭侯元年成師封曲沃號為桓叔是時年五十八矣好德晉國之衆皆附焉君子曰晉之亂其在曲沃矣末大於本而得民心不亂何待至是晉大臣潘父弑其君昭侯而迎曲沃桓叔桓叔欲入晉晉人發兵攻之桓叔敗還歸曲沃晉人共立昭侯子平為君是為孝侯

誅潘父

子平經世大紀皆作弟世家稽古錄作子為是

三十有六年衛莊公薨子完嗣

是為桓公

三十有八年衛州吁出奔

世家曰桓公二年弟州吁驕奢桓公絀之州吁出奔

四十年齊莊公薨子祿甫嗣

是為僖公

晉曲沃成師卒子緡代

是為曲沃莊伯

四十有二年宋宣公薨舍其子與夷而立弟和

是為穆公○大紀附正考父三命事

燕鄭侯薨子嗣

是為穆侯

四十有四年鄭叔段命西鄙北鄙貳於已

左氏曰大叔命西鄙北鄙貳於己公子呂曰國不堪貳君將若之何欲與大叔臣請事之弗與則請除之無生民心公曰無庸將自及

四十有七年晉曲沃緡入翼弑其君孝侯國人

逐之立其君之子郕

是為鄂侯

四十有八年魯初請郊廟之禮

孔子曰我觀周道幽厲傷之吾舍魯何適矣魯之郊禘非禮也周公其衰矣○外紀曰初魯惠公使宰讓請郊

廟之禮於天子王使史角往魯公止之

其後在魯

○路史曰

劉原父謂使魯郊者必周而必非成王蓋平王以下固亦未之悉爾始魯惠公使宰讓請郊廟之禮於天子天子使角往止之其後在魯於是有墨翟之學魯之用郊正亦始於此矣夫惠公之止之則是周不與之矣不與而魯用郊自用之也昔者荆人請大號周人不許荆人稱之然則魯之郊禘可知矣惠公之請由平王世也○陳氏曰諸侯之有郊禘東遷之僭禮也史曰秦襄始列

於諸侯作西時祠白帝僭端見矣位在藩臣而臚於郊  
祀君子懼焉則平王以前未有也魯之郊禘惠公請之  
也惠公雖請之而魯郊猶未率為常也僖公始作頌以  
郊為夸焉記禮者以為魯禮皆成王賜之以康周公按  
衛祝鮀之言曰周公相王室以尹天下於周為睦分魯  
公以大路大旂夏后氏之璜封父之繁弱殷民六族以  
昭周公之德予之土田陪敦祝宗卜史備物典冊官司  
彝器則成王命魯不過如此隱公考仲子之宮問羽數

於衆仲周公閱來聘饗有昌歠白黑彤鹽周公以為備  
物辭不敢受衛甯武子來聘宴之賦湛露及彤弓武子  
不答賦曰諸侯朝正於王於是賦湛露諸侯敵王所愾  
而獻其功於是乎賜之彤弓假如記禮之言得用郊禘  
兼四代服器則祝鮀不應不及况魯行天子之禮久矣  
隱公何以始問羽數閱何以辭備物之享甯武子何以  
致譏於湛露彤弓于以見魯僭未久上自天子之宰至  
于兄弟之國之卿苟有識者皆疑怪遜謝而魯人並無

一語及於成王之賜以自解故郊禘之說當從劉恕倘  
自史角之事之外別有傳記與明堂位合則外紀豈獨  
遺佚乎

魯惠公薨國人立其子息姑

是為  
隱公

左氏曰惠公元妃孟子孟子卒繼室以聲子生隱公宋  
武公生仲子有文在其手曰為魯夫人故仲子歸于魯  
生桓公而惠公薨是以隱公立而奉之

陳氏曰古者諸  
侯不再娶再娶

亦妾也隱桓之母俱不得為夫人子王子曰甚矣左氏  
之好誣也嬰兒之生其手安得有四字之文隱公將遜

國焉而遇弑無後其後魯之君大夫皆桓子孫立為是說以證仲子之正桓之嫡而文其弑君之罪耳左氏不辨其誣而錄之妄矣 ○公羊氏曰隱長又賢諸大夫扳隱而立之

隱於是焉而辭立則未知桓之將必得立也且如桓立則恐諸大夫之不能相幼君也故凡隱之立為桓立也 ○穀梁氏曰孝子揚父之美不揚父之惡先君之欲與桓非正也邪也雖然既勝其邪心以與隱矣已探先君之邪志而遂以與桓則是成父之惡也兄弟天倫也為子受之父為臣受之君已廢天倫而忘君父以行小惠



曰小道也若隱者可謂輕千乘之國蹈道則未也

履祥按古者諸侯一娶九女一嫡以其嫡姪從他國亦以嫡姪媵焉所以備內官防天折繁子孫也故諸侯不再娶有嫡立嫡無嫡立庶庶均立賢賢均立長惠公元妃孟子卒繼室以聲子生隱公則隱公固當立者仲子之歸宋武公以夫人嫁之魯惠公以夫人逆之天王亦以夫人贈之非正矣於公議則非正然隱公則不敢以為非也惟有遜國而已矣隱公不敢自以為正攝位君國將以予桓菟裘之營未畢而卒遇弒為善罹禍此世道之大變也此春秋所為託始也



御批資治通鑑綱目前編卷九



總校官庶吉士臣張能照

校對官檢討臣郭寅

謄錄監生臣許祖懷